

ROOMMA

Pauroofa Roomma maqannaA

akaranimaqoo ufafa.

¹ Qinee Pauroosa Anutuna asauku mundirana Yisufa mara firiqai faiqisa maridaqa mina ainaina dadaaqimaruna faiqisa maridaqa. Anutufa qini maqasaa fasiqa Anutufa faiqi aanaaseekinaana rusandeesamumasee narí amiqira fasaasa ufara qimannimiannee qimaqoosa maridaqa.

² Mi amiqira fasaasa ufana naaru kambiqaaninnanara Anutufa ooqai uqanna narí tamummaqara fasiqauqa narí ookiqari qimannimisoofaqa quandafiqa faiqi anaasee qimannimisee quandakiqa naaquqara akaraki quqaqoofa maridanoo.

³⁻⁴ Mi amiqira fasaasa ufana narí amaaku narí asauku mundirana Yisunara maasa karaambaiqara qidanoo. Mifa Dafidinakiqari kambiqoonara maasa maqasaa fasiqee qidaqa. Anutufa narí firaa afeekannai kuqiranakinaana Yisuna mara findifumaseenoo minannai uqannifiqasoofaqa iriseeqa misa minara Anutuna amaaku innaarunaindaraafa naaquqarafee qidaqa.

⁵ Yisuna minannai Anutufa qini amiqi amiqinoo qimannimira fasiqaikamambi maridana aiqama maqanna naarama minisee Yisuna amiqira fasaasa ufa qimannimisainaqa

iriseeqa mi mau fiqa Yisuna auqu uqeeraaqeera qiniara qimaqoosa maridaqa.

⁶ Aiqama maqannaasara qidaqa inni Roomma maqannaasara faqa qidaqa Anutufa inniara narí asauku mundirana Yisunaindi kiaqeera qimaqoofa maridanoo.

⁷ Anutufa inni Roomma maqannaasa faqa naarameeqeenoo qini qiku qisauku kiaqeera qimaqoosa mariafaqa. Qinee Pauroosa minara iriseeqa inni akara rumannimaqaunafa maridanoo. Anutufa maasa qikoofa faqa narí asauku mundirana Yisuna maasa karaambaiqa faqa narí amiqi amiqira oosana faqa narí aundura asooarana faqa inni nimiani.

Pauroofa Roomma maqannaasara Anutu finnai dufi dufi qidanoo.

⁸ Maa ufanannai inni qimannimiranara qianauro Anutuna asauku mundirana minannai qinee Pauroosa inni Roomma maqannaasara Anutu finnai dufi dufi qimamaqaidaqa. Aiqama maqannaasa innee Yisuna saqarikiranara irimarifaqa minara qinee Pauroosa innaaru qimamaqaidaqa dufi dufi qidaqa.

⁹ Qinee aiqama kari maqee maqee inni Roomma maqannaasara iridaqa Anutufinnai maqee maqee innaaru qimarunnanara minara Anutufa iridanoo. Qinee qeeqa qimuqusa ookiqari qeeqa iriranannai Anutunara eedoo qira dadaaqira ainainiranakina maridaqa. Maridaqa narí amaaku amiqira fasaasa ufa faiqí anaasee qimannimidaqa. Qinee inniara

Roomma maqannaa faiqí aanaaseera innaaru qidee qunanoo Anutufa kuqaa fee qiannoo.

¹⁰ Qinee ooqaindari inni maqusai oonuree inni nindafarara irida marunnaara maqee Anutufa qini dadaaqinaqa inni maqusai oonu mariannanara minara faqa innaaru qidaqa.

¹¹ Qinee firaaqoo inni nindafarara qidaqa innaarunaindaraa amiqi amiqirana moo inni naida nimianaqa innee Anutunaki afeekaikamafi mari-aqeera iridaqa.

¹² Qinee minara maaqi qidaqa qinee faqa innee faqa narí dadaaqi narí dadaaqirara innee Yisuna saqarikirana faqa qinee faqa Yisuna saqarikirana faqa narí dadaaqi narí dadaaqiaqa.

¹³ Innee Roomma maqannaasa maa ufana iri-aqa. Qinee inni maqusai moomoo kari firari mariafananoo moo ainaina rafaqaqafinau. Qinee moomoo maqusanaasaki sia Yuda maqannaasaki nimariafanausa miqidaqa misakinaana oonu rarisameegee Yisunaki quqeemarunausa inniki faqa ooqaindari miqianee qidaqa.

¹⁴ Aamina maqannaa faqa irirana faqaasa faqa aikara foora daruqoofanoo maridanoo. Misa aiqama Yisunufa qimannimianaqa irifanoo mi aikana darirafa tatiño qifaaqa aufadaannoo.

¹⁵ Mi aikana tatiranara irisee qinee inni Roomma maqannaasa faqa Anutuna amiqira fasaasa ufa qimannimiraree qidaqa.

Anutuna afeeka ufa asumu mariranaki quqan-nisee marifa.

¹⁶ Anutuna amiqira fasaasa ufa Anutufa faiqí mareegee asumu mariranaki quqeemari

afeekafa maridanoo minannai Yuda maqannaa naaree aanaamuru mariasa innaaqiana irisee mi mau finausa Anutufa asumu mareeqee quqaannoo. Minara qinee mi amiqira fasaasa ufanaki qeeqa daundura firaqoo mara quqaidaqa.

¹⁷ Anutufa faiqí anaasee aaqemariasa narí namuqaaki mariasa sia naruseenoo mareeqeenoo narí aqoondikidanoo narí amiqira fasaasa ufa minara kooroo idanoo. Maasa Yisuna saqarikirana mifa kai Anutunara aqoondikirana nimidanoo. Ooqeenaa tamummaqara fasiqauqa akara minara maaqi qinoo maridanoo. Faiqí anaasee Anutuna saqarikiranannai mina aqoondikinausa misa kai naaru naaru marirana mareefaranoo.

Faiqí faiqi mandoosana fannoo Anutufa nari-ranaki quqannisaidanoo.

¹⁸ Faiqí anaasee mandainaina faqa kudimakirana faqa miqanda Anutuna anoona ufa rafaqaqafaqa sia irida maridaqa, minara Anutuna aanoo qirana narirafa inaarunaindari akooqoo misasaa qumu maridanoo.

¹⁹ Maanara Anutufa misa naridanoo. Faiqí faiqi Anutunara irimari ainainafa akooqoo maridanoo. Anutufa narí kai uqannifiqasoofanoo marifaqa sia irimariafanoo.

²⁰ Ooqai Anutufa maa maqa maaqana auquqooqari mina kukeeqarana idaaqirana faqa mina naaru naaru marira afeeka faqa innaaarunaindaraa andeeqara marirana faqa narí auqu quqoo ainainaki akooqoo marufa

maridanoo. Faiqí faiqí Anutufa auqu quqoo ainainaki qafamasee sia Anutunara irida fee qifaranoo. Miqi qimasaidaqa unna qimarifanoo Anutufa mi ufana sia iriannoo kaqi naruannoo.

²¹ Misa Anutunara iridaqa sia minara dufi dufi qidaqa, kafaa sia mina auqu uqeeraidaqa. Misa quandaki nári irirafa firaqoo furufariranaki kai maridaqa misa nitikura fifau maridanoo asukuna kai qumbiqanoo maridanoo.

²² Misa náriara irirana faqaasee qimasaida unna qimasaidaqa furufariranaki maridaqa.

²³ Misa Anutuna naaru naaru marira areenarana mafi quqasee Anutuna innaaruqirana faqa amooqirana faqa mafi quqasee fifau faiqí faiqí amanauqirana faqa ufni amanauqirana faqa aandau amanauqirana faqa amuaqundari maqamau nimarina amanauqirana faqa marasee maasa Anutu fee qimasee minara innaaru qidaqa amooqidaqa.

²⁴ Faiqí misa nári furufarirafa miqinoo firaafa marifanoo Anutufa misa mareeqeenoo nariqa nimuqusimari mandainainaki quqasaifaqa faiqí narinni narinni ira ainainara nisaurira ainaina kai maraيداqa.

²⁵ Misa Anutuna anoona ufa mareeqee kaqinni quqaseeqa unna ufa mareeqee nifusaa quqasee minara kuqaa fee qidaqa. Naaru naaru amooqimaria Anutuna aqama ainaina auqu quqoo Anutunara minnisee quandaki Anutufa auqu quqoo ainainara fifau ainainara innaaru qimasee maasa Anutu fee qimasee mi mau fidaqa.

²⁶ Anutufa faiqí anaasee nári manda niranara qafamasaifanoo akooqaiifanoo kaqi minaki nifee-

qaidanoo. Minara aanaaseeuqa faqa nári nifaaq-
maaka minnisee andeeqara oosana minnisee
narinni narinni oosana oosana manda marirana
maraidaqa.

²⁷ Faiqí miqi kai iqa nári ninaaqmaaka faqa
amiqira oosana minnisee nariara nariara ridaqa
idara foorá nitakuqidanoo. Faiqí misa nar-
inni narinni nisaurira ainaina maraseeqa mina
akiaqara nári nifaaqasaa aurirana aidafirana
marasee aupuraidaqa.

²⁸⁻³¹ Faiqí anaasee Anutuna anoona
ufara nikooqaifanoo Anutufa misa maree-
qeenoo mandainainakina sia fuaqaa ira
mandainainakina quqasaifaqa minaki fidaqa.
Miqianara maa manda ainaina oosana oosanafa
qumbiqaidanoo, manda oosana faqa, kaqa
ainainara rimarina faqa nariara nariara fidaqaa
imariana faqa nariara nariara rairai qirana faqa
faiqí kuqannarirana faqa narí afumau narí
afumau irafa faqa nári ueeqee narí ueeqee
imariana faqa manda oosana oosana faqa
nariara nariara munuqi miniqi imariana faqa
misa Anutunara fidaqaa imariana faqa kaukaata
qimariana faqa nári nifaaqa nimooqirana faqa
nariara kai firaaqoo ufaqí marina faqa maqee
maqee mandoosanara randeemariana faqa
nári ninaukoo ufa rukiee mariana faqa sia nári
andeeqaramau firanara uriqararanee qimariasá,
faqa nariqa qimannimira ufa rukiee mariana
faqa sia nári nikaqaafasaara amuqusirana faqa
mi manda ainainnausaki fimariasá maridaqa.

³² Anutufa minaki fimariasara kuqiranaki fi-
mariaa maqi qida qifaqa iridaqa kaqi minaki

fidaqa. Sia minakaifau miqidau firaa manda oosana marasee akaqausa mi mandainainaki dadaaqimariasara misara faqa eedoo qimaseeqa asasidaqa.

2

Aiqamausa Anutufa narira ufa ameemaanai maridaqa.

¹ Oo qini qiqoondi sia anee akaqausara aaqeeaafoo qinana anee faqa mi aaqarana maree marianafa mariananoo. Anee faqa naqimasee Anutuna arirana eerairinnaree, Anee akaqausara miqinana anee faqa mi manda oosanna kai maree mariananoo aninna qaoo qira ufa fannoo aninna aruannoo.

² Faiqi anaasee mi manda oosanna maree marifanoo Anutufa kai misara narira ufa qiannoo. Anutufa sia aaqaidanoo andeeqaidanoo misa narira ufa ameemaanai quqannisaannoo.

³ Qini qiqoondi anee sia amana akaqausara qaoo qinnaranoo, anee qaoo qidee qidana aneenna faqa minaki fimarianafa mariananoo. Anee miqi mariannanara naqimandeenee Anutuna ariranara eerairinnaree, sia amana eerairinnaranoo.

⁴ Inniara Anutufa aneenna mandainainakiqari mifinnai ubeekeefandinnanara reendeenamasee rakisidanoo maridanoo. Innee minara Anutufa reendeenira oosana marainara innee minara furufarira oosana fee fee qimaseeqee kaqi mi mandosannaki marida fee. Anutufa inniara reendeenira oosana fannoo sia furufarira oosanafau maridanoofau. Inneeqa mandainaina minnisee

quandaki narinnai ubeekaaqee qimari oosanafa maridanoo innee sia fee minara iridaqee.

⁵ Inni naaqooki ooni ititanoo marifaqara foora sia ufa irimariafanoo. Miqianara Anutuna andeeqara ufa faqa mandainaina akiaqara narira ufa faqa kooroo inna faasaana mikari inniqa mandainaina fannoo inniqa narira ufa firaqoo uriqaramafuannoo.

⁶ Mi faasaanna Anutufa aiqama fasiqa anaasee nári maree mariana akiaqara kai nimiannoo.

⁷⁻⁸ Akaqa fasiqa anaasee amiqira oosana kai maraqa nidaqa innaarunai areenarana faqa innaarunai nuqu uqeerarana faqa naaru naaru mariranara faqa randaidaqa. Miqi mariasa Anutufa naaru marirana nimiannoo. Akaqausa nári nifaqara kai ridaqa andeeqarana futeeqaidaqa aaqaranaki kai fidaqa. Misasaa Anutufa narí aanoo qirana faqa narí aranaqarana faqa nam-mariara foora adiannimaqaannoo.

⁹⁻¹⁰ Nidafirana faqa aupuranara faqa Anutufa aiqama mandoosana maree mariasa misa nimiannoo. Yuda maqannaasa naaree nimiseenoo innaaqiana aanaamuruqa nimiannoo. Anutufa miqi kai inoo aiqama andeeqara oosana maree mariasa nimooqirana faqa nuqu uqeerarana faqa nimuqusaki asooarana faqa nimiannoo. Yuda maqannaasa naaree nimisee innaaqianna aanaamuru mariasa nimiannoo.

¹¹ Miqimasee Anutufa aiqama maqannaara amana amana kai nári maree mariana akiaqara nimimarifa maridanoo nimiannoo.

¹² Anutufa narí sandufa Mooseena
qimamufanoo mifa quandasee Yuda

maçannaasa qimannimisoofaqa misa mi sandufana qumarasee marusa maridaqa, misa mandoosana maraifanoo Anutufa Mooseena sandufannai misa qumaree naruannoo. Anaamuru mariasa Anutufa Mooseena amu sanda ufana sia mina ameemaanai maridaqa kaqinni maridaqa, misa mandainaina oosanara minni kaqinni marinannai naruannoo.

¹³ Sia Mooseena sandufa naaqoonnai irimariana sia minau Anutufa narafusaa andeeqaranaki faiqí anaasee quqaidanoofau, mi sandufana marasee imariana andeeqasee auqee marianannai kai Anutufa narí andeeqaranaki quqanisaannoo.

¹⁴⁻¹⁵ Misa Yuda maçannaasa Mooseena sandufa maree mariasa maridaqa aanaamuru mariasa Mooseena sandufa siaisa mariasa maridaqa misa narí iriranannai Mooseena sandufara sia irirai kaqi mi mau fidaqa, doo Anutuna ufamau fimariasa maridaqa. Mi oosanafa Anutuna sandufa naunduraki akara rinoo marifaqara foora kooroo ifaqa miqidaqa. Anaamuru mariasa Anutuna ufa sia irimariasa nariqa kai moo oosana manda oosanee qimasee moo oosanara amiqira oosanee qimasee qimariafa mifa kai Anutuna sandufa ooqai kukeeqasee quqaqoofa naundurakiqari kooroo idanoo.

¹⁶ Kasooqaqee anianinna faasaana Anutufa narí asauku mundirana Yisunannai faiqí anaasee aiqama naunduraki kukeeqarana kooroomaseenoo rainannimaqaannoo, Qinee Pauroosa Anutuna amiqira fasaasufa faiqí anaasee qimannimiqa nidaqa minara

qimannimidaqa.

Yuda maqannaasa Mooseena sandufa afeekaikidaqa.

¹⁷⁻²⁰ Innee Yuda maqannaara qidaqa anee Yuda maqanna mariananoo anee Mooseena sandufa saqariki marianafa mariananoo, anee Anutunara fifau iridee qimasee firaqoo ufa qidana aneenna auqu uqeeree marianafa mariananoo, anee Anutuna andeeqara aanara irimarianafa mariananoo. Anee Mooseena sandufakinaana amiqira aanara faqa manda aanara faqa rainasee irimarianafa mariananoo, anee aneennara nifu dimbarausa aana uqannifiqee marunausee qimarianafa mariananoo anee aneennara asukunaki mariasa misa qooma maridee qimarianafa mariananoo, anee aneennara furufarirausa irirana nimimarunausa qimarianafa mariananoo faiqiuqaindi amiqira aana uqannifiqee marunausee qimarianafa mariananoo. Anee Mooseena sandufa minakiqari aiqama irirana faqa anoona ufara faqa qinee irida fee qimarianafa mariananoo.

²¹ Doo qinee aniara qianaara, anee uqannifiqee marianafa mariananoo, nanaree sia aneennara faqa mina mareenee. Anee misara sia ummuariqee qimaseenana doo aneenna ummuari marianafa mariananoo.

²² Anee misara sia faiqi anaasee narí ummuari narí ummuari iaqee qidana, anee faqa sia fee ummuaridanee. Ooninnai saqarinnai unna qira Anutunara foora mina amana auqimarianara fidaqaa imariananoo fee anee fee mi unnaqira anutuna amaana maqakina keeqafida minakinaa

amiqira ainainara fifau ainainee qimaseenanee kaqi maraidanee.

²³ Anee aneennara Anutuna sandufa qumaree marunausee qidana aneenna auqu firaagoo uqeeree marinafa, aneefee Anutuna ufa rukiaseenanee asaurirana amidanee.

²⁴ Ooqeenaa tamummaqarausea akarakina iniara maaqi qidanoo. Anaamuru inni Yuda maqannaa mandoosana qafamasee quandaki Anutunara manda ufa qidaqa.

²⁵ Innee Yuda maqannaasa inneeqara fainanduqirausee qidaqa miqianara Anutuna faiqi namufee qimariafanoo. Qinee Pauroosa minara maa ufana qidaqa. Innee miqi mariasa Mooseena sandufamau amiqimandee fidaqa inni fainanduqirafa amiqira ainaina mariannoo, mina ufa rukiaseeqa fifau nipata aukirafa, sia Anutuna faiqi namu mariafanoo aamina aanaamuara foora marifaranoo.

²⁶ Aamina aanaamuru mariasa sia Yuda maqannaasa fainanduqimarusa misa nári kai sia irirai Mooseena sandufamau andeeqaramau fimarifanoo Anutufa mina qafamaseenoo Yuda maqannaara foora mariaafoo qiannoo.

²⁷ Anaamuru mariasa sia Yuda maqannaasa fainanduqimarusa misa andeeqaseeqa Anutuna ufamau fifaqa innee Yuda maqannaa fainanduqimarusa Mooseena sandufa inni ufakiqari akararirana rukiasaifanoo aanaamuru aamina maqannaa nári andeeqarafa inni Yuda maqannaasa mariranara mandainainee qiannoo.

²⁸ Yafee Yuda maqannaa uqanna Anutuna aiku asauku uqanna maridanoo fee, apatasaa kooroo

irafa mifee anoona maridanoo fee. Anutuna ufamau fimariasa mi fee anoona maridanoo fee.

²⁹ Sia apatasaafau anoona maridanoo naundura nimuqusakiqari Anutuna ufamau fimariasa misa anoona maridanoo fainanduqirausara foora maridaqa. Sia Mooseena sandufa irirana irirafa mifau Anutuna aiku asauku kamanimaqaidanoofau. Anutuna maraquna naundurai saikisa misa kai Yuda maqanna uqannara foora Anutuna aiku asauku maridaqa. Miqifandinna fasiqausa sia faiqí nimoogiranafau maraidau, Anutuna amooqiranara ridaqa randasee maraidaqa.

3

¹ Qinee minara irammirisee qimannimianaura Yuda maqannaasa aanaamuru urinnaaqaraqa maridee kaqi fifau fee miqiqa marida fee. Misa fainanduqirausa misee aanaamuru urinnaaqaraidee kaqi fifau fee miqi qida fee.

² Oo sia fifau miqi qidaqa misa uriqararafa firaafa maridanoo. Doo qinee oosantarasee maqi qimasee qimannimianaura, Anutufa narí ufa Yuda maqannaasasaa quqaqoofanoo marinau.

³ Akaqausa sia narisaa quqaqoonara irisee andeeqaramau fiqa rukiasee kaqi runnambiqau. Anutufa misa furufarirana qafamaseenoo qinee faqa misa qima afeekaikamma nimiafanna ufana qinee faqa misa naanna reeqa rukiaanauree qianauree.

⁴ Qinee Pauroosa minara maqi qidaqa. Oo sia uqanna Anutufa mi mandoosanna maraanoo anoona ufa kai qimarifa maridanoo. Faiqí

anaasee unnufa kai qimariasa kai mariafanoo sia Anutufa miqiannoo andeeqasee anoona kai qianoo. Ooqeenaa akara Anutunara maaqi qinoo maridanoo.

Ani ookinaa ufara aiqamausa anoona ufa fee qifaranoo. Misa ani ufara amanamandee irifanoo anoonaikammianoo.

Dafidina akarakinaa ufa Anutunara miqimminoo maridanoo.

⁵ Misa faiqí faiqi unna qimasee maaqi qimasee Anutuna andeeqaranara qidaqa. Maasa faiqí faiqi qiqa aaqarafa quandaki Anutuna andeeqarana mara maree kooroomeeqeenoo uqeerainaqa maasa qeeqa aaqaranara amiqira ainainee qianauree. Miqooqari maasa maaqi qianaura mandainaina akiaqara maasa Anutufa darinaqa maasa maaqi qianaura Anutufa aaqaidanoo daridanoo fee qianaura.

⁶ Qinee Pauroosa minara maaqi qidaqa. Oo sia uqanna Anutufa aaqaidanoo. Anutufa sia uqanna aaqaidanoo, narí andeeqarafa marinara maasa andeeqaqisaannoo mina andeeqarafa sia marinanoofau sia amana maasa aiqama maqannaasa ufa iriseenoo andeeqaisaiqini.

⁷ Misa faiqí faiqi unna qimasee maaqi qimasee Anutuna anoona ufara qidaqa, maasa qiqa unna ufa fannoo Anutuna anoona ufa kooroomafi uqeerainanoo qiqa unna ufa amiqirafa maridanoo nanaree Anutufa qiqa unna ufa akiaqara qiqa daruannoo fee.

⁸ Qinee mi manda ufanara eedoo qaanaqau maaqi qiaqini, Doo aniaqa maasa manda marirana uqeeraseeqa minannai amiqira

marirana kambiqasaanee qiaqa. Mi manda ufana uqeereemaria fasiqausa Anutufa misa mara mareenoo nári nariranaki quqaannoo. Sia aaqaidanoo miqidanoo, andeeqaidanoo miqidanoo. Mi aaqara ufana qimariasa qini Pauroosara faqa unna qimasee Pauroofa maasara manda marirana uqeerasee minannai amiqira marirana kambiqaanifeera qimasee minannai qini diqidaqa aaqee mariafanoo.

Aiqamausa nári mandainaina ameemaanai maridaqa.

⁹ Doo qinee kafaa Pauroosa minara maaqi qimasee iraidaqa, Anutufa maasa Yuda maqannaasee, aanaamuru mariasee, uriqaraida fee qidanoo amana amana kai fee maridee qidanoo. Qinee Pauroosa oo sia moo uriqarara fee qidanoo doo qinee faasai qimannimiqa sia moo fannoo uriqararafa mariaafoo qidaqa aanaamuru faqa maasa Yuda maqannaasa faqa nári mandainaina ameemaanai ureeqaqa mariaafoo qidaqa.

¹⁰⁻¹¹ Ooqeenaa tamummaqara fasiqausa akara minara maaqi qinoo maridanoo.

Aiqama maa maqa maaqanaki mariasakiqari moodaa fasiqa sia uqanna andeeqarafa maridanoo, aiqamausa miqirausa kai maridaqa. Misakiqari sia moodaa fasiqa Anutuna aanara randaidanoo.

¹² Aiqama fasiqa anaasee uqanna Anutuna afusaaqari quandaki kaqi runnamma ubeekamasee aaqaranaki fimariafanoo. Sia moodaa fannoo amiqira oosana maraidaqa sia uqanna.

- 13 Misa noo aamara faiqí madikara foora oo raqanoo marifaqa faiqí kurididaqa. Misa ufa fannoo sakani ukaqa nimiranara foora inoo maridanoo faiqí kuqannaruaqaa ufa kai qimariasa.
- 14 Misa nookiqari sukufa kai qidaqa niquraree mariasa.
- 15 Misa dauni faiqí kuqannarirana aupurarana nimimariasa.
- 16 Miqi mariasa fimariaqoo kai faaqa fuisee qirana faqa aiqama ainaina kuridi kaaridiqa turi taariqa fidaqa.

17-18 Misa sia asoara aana qafeeqa sia Anutunara naaquqaranara irimariasa maridaqa.

Ooqeenaa tamummaqara fasiqauqa akara Yuda maqannaara faqa aanaamuru mariasara faqa amana amana kai miqi mariasee qimaqoofa maridanoo.

19 Mooseena sandufakina mina ameemaanai mariasara qidanoo qimarifaqa maasa minara iridaqa. Faiqí anaasee aiqama maa maqannaasa náriara andeeqarausee qimaria ufana oosana oosanauqa aruseeqa aiqamausa mareeqee Anutuna narira ufa ameemaanai quqaaqeera Mooseena sandufa ani maridanoo.

20 Sia faiqí anaasee moo fannoo Mooseena sandufannai andeeqara fasiqaikamambi Anutuna afusaa mariannoo. Sia minarau Mooseena sandufa ani maridanoofau. Faiqí anaasee maasa aaqee marunaasee qiaqeera Mooseena sandufa ani maridanoo.

Anutuna afusaa andeeqasee marirafa kooroo inoo maridanoo.

21 Doo maqee kamuqoo Anutuna afusaa andeeqafi marira oosana doo kooroo inoo maridanoo. Sia Mooseena sandufarau qidaa, aaduma moo ufara qidaa. Mooseena sandufa faqa tamumaqarusa ufa faqa doo minara kooroomasee maaqimminoo maridanoo.

22-23 Faiqí anaasee narí Anutuna asauku mundirana saqarikiranannai Anutufa mareeqee narí afusaa andeeqaranaki quqaidanoo. Aiqamausa asauku mundirana Yisuna ufa irisee minasaa rusimariasaa miqi qimariasaa aiqama maqannaasa Anutufa mareeqee narí afusaa andeeqaranaki quqaidanoo sia raina rainiannoo.

24 Aiqama maqannaasaa fasiqaa anaasee aaqoonara Anutuna innaaruna asumu mariranasaaqari nianai mariafanoo minara Anutufa narí afaariranakiqari kaqi nimira ainaina narí asauku mundirana Yisunannai misa mareeqeenoo narí afusaa andeeqaranaki quqanniseenoo narí mandainainakinaana idukunnisanau.

25 Anutufa Yisunannai faiqí anaasee mandainaina akiaqara mininnisaaninafa kambigaanifee qimasee Yisuna aqiqamasee nimufaqa aunirira saqarisaa ariqau. Mi fasiqaa anaaseesa nariqaa Anutuna andeeqaranaki sia amanaikiqaa Yisuna saqarikidaa. Minaki keeqaranannai Anutufa misa mandainaina taikannisaidanoo. Anutufa narí andeeqara oosana kooroo ianifeera qimaseenoo narí asauku mundirana aunirira saqarisaa quqaseenoo minannai faiqí anaasee mandainaina akiaqara narí maranau. Ooqai maru aukuaana Anutufa

faiqí anaasee sia mandainainara narimarinau kisaaqasaa kasooínoo marida nifauee marinau.

²⁶ Maqee mari aukuana dauni ufa qimasee andeeqannisaidanoo narí andeeqarana kooroo ianifeera faiqí anaasee mareeqee narí afusaa innaaruna andeeqaranaki quqaidanoo. Anutufa Yisuna mareeqeenoo aunirira saqarisaa aruseenoo minannai maasa mandainaina taikaqisanau. Miqiranannai Anutufa qaara ainaina kooroo idanoo, narí andeeqarana faqa Yisuna ufasaa irirana rusisee mi mau fimariasa mareeqee narí afusaa andeeqaranaki quqannisarana faqa kooroo idanoo.

²⁷ Yuda maqannaasa Mooseena sandufamau fidaqa náriara andeeqaransa maridee qimasee nári nipatara nimooqida maridaqa. Sia sandufa miqínoo maridanoo Anutuna ufasaa irirana mundinoo marifa narí mina mandaagee marinafa mifa kai andeeqarafa maridanoo. Mifa kai Anutuna innaaruna andeeqaranaki quqaqisaidanoo.

²⁸ Minara maasa maaqi qidaqa Yisuna saqarikiranannai kai Anutuna innaaruna andeeqaranaki keeqafi mariannoo, sia Mooseena sandufamau finnanannai innaaruna andeeqaranaki keeqeefaranoo.

²⁹ Anutufa Yuda maqannaasa Anutufa kai fee maridanoo, aanaamuru mariasa Anutufa faqa maridanoo fee. Doo Yuda maqannaasa faqa aanaamuru aiqamausa faqa Anutufa maridanoo.

³⁰ Anutufa moodaa maridanoo, moodaamau fimarifa maridanoo. Yuda maqannaasa Yisuna saqarikiranannai Anutufa mareeqeenoo narí

afusaa andeeqaranaki quqannisaannoo aanaa-
muru faqa narí afusaa andeeqaranaki quqan-
nisaannoo anaamuru mariasa faqa miqi kai
masee Yisuna saqarikinnanannai narí andee-
qaranaki quqaannoo.

³¹ Miqunannai maasa Yisuna saqarikidaqa sia
minannai Mooseena sandufa mareeqee aqidaqa,
sia miqidaqa maasa minannai Mooseena sandufa
uqeeraidaqa mi mau fidaqa, minara mi sandu-
fana anoona paquridaqa.

4

*Abarahaamafa Anutunasaa narí irirana
rusinau.*

¹⁻³ Innee Roomma maqannaasaki Yuda
maqannaa akaqausa maridaqa. Maasa Yuda
maqannaa qikeeku qikaaku Abarahaamafa
naqaafeeinau. Mifa andeeqara mariranannai fee
Anutuna afusaa andeeqarafa maridanoofeeinau.
Sia minannaifau miqin角度 Abarahaamafa
miqin角度 maridanoofau Anutuna afusaa narí
andeeqaranara اساسini. Sia amana narí اساسirafa
marinau, Mooseena akarakinaa ufa minara
maaqi qin角度 maridanoo.

Anutufa Abarahaamanara qinau anee
moomoosa nikausaikina marinnaranoo.

Miqi qunara Abarahaamafa iriseenoo oo kuqaa
kambiqaannoo fee qimasee narí irirana Anu-
tuna mi ufanasaa rusiseenoo afaaqa quqasee
kisaagasaa rakisi marinau. Anutufa mina
qafamaseenoo Abarahaamanara oo Abaraha-
mafa qini ufasaa ani irirana rusimarianafa mar-
iananoo andeeqarafa mariananoo fee qinau,

minara Abarahaamafa sia narí andeeqaranara narasasirafa marinau.

⁴⁻⁵ Faiqí moo fannoo moo fasiqa ainainama isainanoo ainaina akoofa mina feefauru amiannoo. Aminanoo sia kaqi fifau qimiifoo qiannoo, narí mina ainaina kadaapirina akiaqara aminoo. Faiqí moo fannoo sia narí kadaapiranasaa andeeqarana maraidanoo kaqi narí irirana Anutuna ufasaa mundimarina Anutufa miqi mari fasiqana kaqi mareeqeenoo narí afusaa andeeqaranaki quqaidanoo. Anutufa faiqí faiqi aaqee mariasara andeeqarausee qimarifa maridanoo faiqí aanaaseeuqa sia nariqa kadaapirifa, kaqi mi ufanasa nári irirana ruisainna fasiqa anaaseesa Anutufa narí andeeqaranaki mara quqannisaannoo.

⁶ Anutufa aaqee maru fasiqa anaaseesa sia narinau, misara andeeqara fasiqa anaaseera foora kaqi mareeqee narí andeeqaranaki quqanau. Dafidifa minara maaqi qimasee akara rinau.

⁷ Anutufa mandainaina akiaqara mininnisoo fasiqa anaaseesa firaaqoo asasidaqa. Nári mandainaina Anutufa rafaqaqafusoonara asasidaqa.

⁸ Anutufa nári mandainaina akiaqara sia irisee naruannoo, mina akiaqara aunusee sia kafa minara ufa qiannoo. Miqira fasiqa anaaseeuqa minara irisee asasidaqa. Doo Dafidifa miqimmasee akara rinau.

⁹ Dafidifa mi asasirausara Yuda maqannaasara kai fee fee qinau. Sia miqinoo maridanoo. Anaamuru mariasa faqa asasifandia maqi qinau. Qinee Pauroosa faasai Mooseena akarakinaana

Abarahaamanara qunafa maaqimminoo maridanoo. Abarahaamafa Anutuna ufa irisee narí irirana minasaa rusisoonara Anutufa minara kai irisee mina mareeqeenoo narí andeeqaranaki quqanau.

¹⁰⁻¹¹ Yairee fee Anutufa narí andeeqaranaki quqanoo fee inau. Abarahaamana fainanduqu sooqoo fee miqinau sia fainanduquaqoo fee miqinau. Sia fainanduqira qoo mi fasanai mareeqee quqanau. Abarahaamafa Anutuna ufasaa narí irirana rusisoonara Anutufa mareeqeenoo narí andeeqaranaki quqaseenoo mina kooroo ianifeera Abarahaamanara fainanduquannee qufanoo miqinau. Miqi kai inoo Abarahaamafa aiqama Anutuna ufasaa irirana rusiranannai Anutuna andeeqaranaki keeqee marusa nikoofaikinoo marinau. Miqi kai inoo sia fainanduqirausa nári irirana Anutuna ufasaa rusisoosa Abarahaamafa misa nikoofaikinau.

¹² Sia fainanduqirausa faqa fainanduqirausa faqa nikoofaikinoo marinau. Fainanduqirausa Yuda maqannaasa sia minara irisee Anutuna andeeqaranaki keeqaidaqa, misa nári nikeeku nikaaku Abarahaamafa mariundee kai iqa sia nári fainanduqiranara iriseeqa nári irirana Anutuna ufasaa rusisoosa Anutuna andeeqaranaki keeqefaranoo. Abarahaamafa sia fainanduqiraqoo narí irirana Anutuna ufasaa rusinau. Magee fainanduqirafa mifa mariundeemmiaqa.

Abarahaamafa narí irirana Anutuna saa rusisoonara qima afeekaikirana maranau.

¹³ Anutufa maa maqa maaqanara Abarahaamafa narí aiku asauku saimbaqa maqa maaqa

fee qinoo qimafeekaikinau. Sia Abarahaamafa Anutuna sandufamau andeeqasee finoofau mina akiagara maqa maaqara qima afeekaikiranana marangofoauinau. Mifa Anutufa ufasaa narí irirana rusisonara minara kai Anutufa mina mareeqeenoo narí afusaa andeeqaranaki quqaseenoo maqara qimafeekaikinau.

¹⁴ Anutufa narí nimianinna ainaina Kannaana maqa maaqa faqa asumu marirana faqa narí sandufamau kadaapirumasee fimariasa kai nimiranoofau faiqí nári irirafa mina ufasaa mundirafa fifau kamambuannoo Anutuna ufa qima afeekaikira ufa faqa fifau maridanoo sia dadaaqiannoo.

¹⁵ Sandufa fannoo Anutuna aranaqarana mareeqeenoo faiqisaa quqaidanoo. Sandufa marinnaqoo kai sandufa rukiarafa mariannoo. Sandufa sia marinnaqoo mina rukiarafa faqa sia miqoo mariannoo.

¹⁶ Qinee Pauroosa Abarahaamanara kafa qidaqa. Anutufa nimianinna ainainara Kannaana maqa maaqa faqa asumu marirana faqa qima afeekaikirafa Abarahaamafa Anutuna ufasaa irirana rusisona minasaa mundinoo maridanoo. Miqunara Anutufa nimianinna ainaina maa maqana faqa asuma marifandinnana faqa Abarahaamana narí aiku asauku faqa misasaa oonu aruakinausa faqa kaqi nimira ainainara foora mariannoo. Sia Anutuna ufaki kadaapirumasee fimariasaindi kai mi ainainausa marifaranoo Abarahaamana aanna ree mariasa, Anutuna ufasaa kaqi irirana rusimariasa misaindi faqa mi ainainausa

mariannoo. Maasa Anutuna ufasaa rusimariasa nikoofa Abarahaamafa maridanoo. Maasa mina aanna ree mariasa kai mina aiku asauku maridaqa.

¹⁷ Anutuna ooqeenaa akara minara faqa maaqi qinoo maridanoo.

Qinee ani Abarahaamana mareeqeeqa moomoo maqannaasa nikoofaikianeera quqeeqa.

Doo maasa mi ufana iriseeqa maaqimmi-daqa, Abarahaamafa nari irirana rusisoo Anutufa nari qimafeekaikunara anoonee qidanoo. Mi Anutufa kuqirusakinaana mareeqee kaqi mari-ranaki quqee marifa maridanoo mina ufa fannoo qufanoo sia maru ainainafa kambiqaanau.

¹⁸ Abarahaamafa nauraiqi kuqiara foora inoo marufanoo Anutufa moomoo maqanna nikoofaikianeera qimamufanoo Abarahaamafa mina ufasaa irirana rusiseenoo sia asasiaqaa iraqoo asasammaseenoo afeesinau.

Minara mifa kuqaa moomoo maqanna nikoofaikamambinau.

Ooqeenaa akara minara maaqimminoo maridanoo.

Anisaa aniaruakinausa moomoo marifaranoo.

¹⁹ Anutufa mi ufana Abarahaamana qimamu aukuana kuqirana adeedi ramasee wan han-deereeta aukuana adeedi ramasee marinoo nari anaqa Saraqana faqa faiqi maqara aukuana ooqai uqanna taikafufanoo marunara amiqimasee iriseenoo, Anutufa faiqi aanaaqiara qimamunara iriseenoo sia Anutuna ufa afaimma quqanau, kaqi mina irirafa mina ufasaa irirana rusisee kuqaa kambiqaannoo fee qimaseenoo marinau.

²⁰ Abarahaamafa narí Anutunasaa narí irirana rusiqoofa sia quqasee finau, sia mifa Anutuna ufara qaara aundura irinau. Abarahaamafa narí irirana Anutunasaa rusisoofanoo quandakinoo Abarahaamana afeeka amufanoo faiqi kambigaaninnanara Anutunara asasinau.

²¹⁻²² Anutufa qimamu ufanara Abarahaamafa afeekaikamandeenoo Anutunara kuqaa afeeka maridanoo qimiannoo fee qimasee asasinau. Anutufa Abarahaamana mi irirana qafamaseenoo doo minara Abarahaamana mareeqeenoo andeeqara fasiqa fee qinau, Abarahaamafa narí irirana Anutunasaa rusisoona minara andeeqarafee qinau.

²³⁻²⁴ Andeeqara fee qu ufafa sia Abarahaamana kaifau miqi qimasee akara rinau, maasara faqa akara rinau. Maasa Karaambaiqa Yisufa kuqiranakinaana uqeeroonasaa irirana rusimarinau maasara faqa akara rinau. Maasa Anutufa mareeqeenoo andeeqara fasiqa anaasee kianinausa maasarammakara rinau.

²⁵ Anutufa Yisuna mareeqeenoo maasa aaqee marunnaara faiqi nisaukuki nimisoofaqa kuqariqau. Maasa Anutuna afusaa andeeqaraisa mariaqee qimasee kuqiranakinaana Yisuna uqeeranau.

5

Anutuna afusaa andeeqaranaki marirafa.

¹ Maasa qeeqa irirana Anutunasaa rusiseeqa marianara doo maqee sia Anutuna aranaqaranaki aanoo iranaki maridaqa Anutufa narí andeeqaranaki quqaqisoofaqa minara doo

maqee mina asooreanaki amiqiranaki maridaqa. Anutuna asauku mundirana maasa karaambaiqa Yisufa minannai kai mi asooreanaki maridaqa.

² Yisufa maasara kuqiranannai faqa maasa qeeqa Yisuna ufasaa irirana rusisaunнанannai faqa Yisufa maasa mareeqee Anutuna kaqi afaariranaki quqasaifaqa maasa maqee minaki kikiqiqa maridaqa. Minaki maridaqa, kasooqagee innaarunai areenarana naida qimiannoo minara iridaqa اساسidaqa afeesidaqa susuidaqa.

³ Sia minara kai اساسidaqa maqee marianaki ummaara oosana oosanakina maridaqa minaki faqa اساسidaqa. Mandainaina ummaara dari-naqa mi ummaarafa sia amiqimasee daruannoo minasaaqari afeeka marasee sia dauni Anutuna ufamau firarana kudoosaapaanaura.

⁴ Maasa oosana oosana ummaarakina sia umooqukida kaqi fimariananoo Anutufa mina qiqafamaseenoo eedoo qiannoo. Mina eedoo qira ufa fannoo quandaki maasa qifeeqarainaqa maasa Anutuna narí areenarana qimianinnanara اساسamasee afeesidaqa maridaqa.

⁵ Mi اساسirana afeesirafa sia qisaurirana qimiannoo Anutufa narí naaquqara maraquna kaqi qimimarifa maridanoo. Anutufa narí naaquqara maraqunannai maasa naunduraki nammariara foora narí aidirana maasa naunduraki adiaqimageenoo narí areenarana naida qimiannoo.

⁶ Ooqai maasa Anutuna andeeqaranara sia amanaikiqa oorudupiqa mariafananoo Anutuna andeeqara aukuanasaa Yisufa maasa

mandoosana maree mariafanausara maasara kuqunnimaqanau.

⁷ Faiqí moo fannoo sia moo fasiqara qimudaoo qimasee mina amaaqa maqasee fifau kuquannoo, abee sia fee faiqí moo fannoo moo fasiqara amiqira fasiqara qimudaoo qimasee mina amaaqa maqasee kuquannoo fee.

⁸ Yisufa sia maasara amiqirausee qimaseenoo maasa qimaaqa maqaseenoo kuqinau. Maasa qeeqa mandainainaki kaqi mariafananoo asauku mundirafa maasara kuqunnimaqanau. Miqunannai Anutufa narí kaaqa maasara amuqisirana aidirana kooroomaseenoo maasa uqaqifiqanau.

⁹ Asauku mundirafa maasa mandainaina nariara mareenoo kuqinoo narí fidika teeqinoo maasa mandainaina akiaqara taikoonannoo Anutufa minannai maasa daundurakinaana mareeqee narí andeeqaranaki innaaruna mara quqaqisanau. Anutufa mina kuqiranara irisee taikara faasaana narí aranaqaranakinaana kuqaa uqanna asumu mareeqeenoo quqaqisaannoo.

¹⁰ Maasa Anutuna namuqaa marufanoo mifa narí amaaku maasa mandainaina arirana maroonara iriseenoo mina kuqiranannai aqoondi kamma quqaqisaifaqa maridaqa. Asauku mundirafa kuqunannai Anutuna aqoondi kamambi maridaqa kaffaa Yisuna kaqi mariranannai mifa taikara aukwana Anutuna aranaqaranakinaana kuqaa uqanna maasa mina aqoondiuqa mareeqee asumu mariranaki quqaqisaannoo.

¹¹ Sia mina kai, Anutufa maasa aqoondi kamma

qimaqoonara irisee Anutunara dufi dufi qidaqa asasidaqa. Anutuna asauku mundirafa Yisufa maasa karaambaiqa minannai maasa Anutuna aqoondi kiqa asasidaqa.

Adamanasaaqaraafa *kuqirafa*
Yisunasaaqaraafa findifrafa.

¹² Ooqai indaaru moodaa fasiqasaaqaraafa Adamanasaaqaraafa maa maqa maaqanaki aaqarafa aninau. Doo mi aaqarana akiaqara kuqirafa moodaa kari ani marinau. Moodaa fasiqa Adamanasaaqari aiqama maa maqana afaaqasasa maria fasiqa anaaseesa mifa aaqoona akiaqara misasaa faqa kuqirafa rafaqa finoo marufa maridanoo.

¹³ Aiqausa aqoonara rafaafinoo maridanoo Mooseena sandufa sia ani marukamuqoo aaqarafa doo ani marufa maridanoo. Mi aukuanna mi fasannai sandufa akara rirana sia marunara Anutufa sia misa rukiaranara irinau.

¹⁴ Indaaruqaa fasiqa Adamana saaqari mi kamusaqa kuqirafa aniufanoo mini Mooseena raquraminau. Mi kamusaqa misa aaqarana Anutufa sia irinau, kuqirafa kaqi kai aiqama maqannaa kaqi kai rafaafunnimaqanoo marinau. Sia aiqausa Adamana aanna ramasee Anutuna ookinaa ufa rukiagau. Nariki moo aaqarafa kaqi marunara kuqirafa kaqi kai rafaafunnimaqanoo marinau. Adamafa kasooqatee kambiqaanina fasiqana Yisuna kikiqusirafa marinau.

¹⁵ Miqanda sia amana amana kai maridaqa Anutuna kaqi nimira ainaina Yisufa sia Adamana

aaqarafara foora maridanoo, mifa aaduma maridanoo. Dinni kuqaa faiqí moomoosa mi moodaa fasiqana Adamana aaqaranaki kuqiqau. Mina dinni Anutuna kaqi afaarirafa Adamana aaqarana uraaqaranoo maridanoo. Anutuna kaqi nimira naaru marirafa moomoosa nimufa moodaa fasiqannai afaaramandee naaru marirana nimufa mifa faqa Adamana aaqarana uraaqararafa maridanoo. Mi moodaa fasiqafa Anutuna asaku mundirafa Yisufa maridanoo.

¹⁶ Anutufa afaaramandee naaru marirana nimianinnafa moodaa fasiqa Adamana mina aaqarana uraaqaranoo maridanoo. Mi ooreeqarana faqa mi uriqarafa faqa miqanda rainarafa maaqimminoo maridanoo, dinni mi moodaa fasiqana narí moodaa kari aaqamasoona akiaqara Anutufa nimaarusira ufa quqaqoofa maridanoo mina dinni faiqí anaasee moomoosaki aaqarafa kambiqafi marufanoo Anutufa sia minara narinau, kaqi narí afaarinoo niminoo qinau, doo andeeqarausa mariafanoo nimaarusira ufa doo taikeno fee qinau.

¹⁷ Qinee kuqaa anoona ufa qimannimiana. Kuqaa moodaa fasiqa faiqí Adamana mina aaqarana akiaqara kuqirafa kambiqeenoo aiqama maa maqa maaqana afaaqasasa mariasa kuqirafa oosana araseenoo manda rakisira rakisinnimaqaidanoo marifa maridanoo. Mi ufana dinni kuqaa moodaa fasiqasaqaraa ainainirafa asaku mundirafa Yisufa mina ainainirafa Adamana uraaqaranoo maridanoo. Faiqí anaasee Anutuna rairaira afaarirana faqa mina kaqi nimira andeeqarana faqa maree

mariasa misa Yisufa asauku mundiranannai sia Adamana kuqiranaki marifaranoo innaarunai kaqi mariranaki afeekaikirausa marifaranoo.

¹⁸ Dinni moodaa fasiqa Adamana oosana maaqimminoo maridanoo, mi moodaa fasiqana aaqaranasaa faiqí anaasee aiqamausa kuqira ufa ameemaanai maridaqa. Mina dinni miqi kai masee moo fasiqa Yisuna moodaa kari andeeqaina akiaqara kuqira ufakinaana idukueeqeenoo kaqi mariranaki quqaidanoo.

¹⁹ Dinni moodaa fasiqa ufa rukiarana akiaqara faiqí anaasee moomoo aaqaranaki aqufiqau. Mina dinni miqi kai masee moodaa fasiqa Yisufa Anutuna ufamau firana akiaqara moomoo fasiqa anaasee Anutuna andeeqarausaikiqa marifaranoo. Minara qinee Pauroosa qiqa, (Yisufa ooqeenaa Adamana kikiqusirafa marinau maqi qidaqa.)

(Mooseefa sia kambiqoo kamuqoo mina sandufa sia marufanoo faiqí anaasee nári mandainainara mana mana imariqau.)

²⁰ Anutufa narí sandufa nimaarusira ufa Mooseenasaa nimufaqa nári mandainainara irufanoo firaanaikinau, miqinoo firaanaikianifeera Anutufa aminau. Faiqí anaasee mandainaina firaqoo ooru fimarufanoo Anutuna afaarirafa mina aakaarinni ooraqareenoo ooriqaranoo marinau.

²¹ Dinni aaqarafa kuqiranannai aiqama maasa rafaqa fidanoo mina dinni miqi kai masee Anutuna afaarirafa Yisuna andeeqaranannai maasa rakisiqimaqaidanoo qifiqeeqeenoo innaaruna asumu mariranaki quqaqisaidanoo.

Anutuna asauku mundirana maasa karaambaiqa Yisunannai qifiqeeqee quqaidanoo.

6

Mandainainakiqari kuqiarara foorammidaqa.

¹ Anutufa narí afaarirana maasa qimunara minara naqi fee qianauree. Maasa maaqi qimasee aaqamasee qianauree, maasa mandainaina aaqaranaki kaqi mariananoo Anutufa mina minnisaina afaarirafa firaanaikée iannoo fee qianauree.

² Oo sia uqanna maasa miqi qianaura Yisufa aunirira saqarisaa kuqinau, maasa mina faqa kuqiira foora iqa marunnaara maqee maria mandainainakiqari kuqiira foora iqa maridaqa. Naqimasee maqee mari mandainainaki fuanau-ree doo kuqiarara foora iqa maridaqa.

³ Innee maa ainainnara amiqimasee iridee sia fee iridee. Maasa Asauku mundirana Yisuna auqusaa nammari maraafannaqoo maasa Yisuna saimbaqa narí kuqiranaki keeqeeqa nammari mina kikiqa ususeeqa mareeqa.

⁴⁻⁵ Maasa nammari maraafannannai maasa Yisuna namufaqa qikundeera foora iqa narí kuqirana naida qimidanoora foora qinoo, mina akoofa narí kaaqa areenara afeekannai narí asauku mundirana kuqiranakinaana mara findifuna, maasa miqi kai masee maasa fuka mari-ranaki mariaqeera qinoo maasa kuqiranakiqari-ara foora findifumaqisanau. Maasa Yisuna faqa kuqiqa moodaanaki kammidaqa miqikaimasee mina faqa findi fiqa mina moodaa kaqi mari-ranaki marianaura.

⁶ Maasa maa ainainna iridaqa, maasa manda marira nirana ameemaanai maridaqa. Doo maasa minakiqari idukuanifeera Anutufa maasa mareegeenoo asauku mundirana faqa aunirira saqarisaa kuqannarinau. Maasa sia kaifaa ooqeenaa marirana maraqa nuageerou miqinai.

⁷ Miqinoo marifaqa maasa minara maaqi qidaqa, faiqi moo fannoo kuqinanoo mina manda marira nirana mina afaaqasaaqaraafa idukuanoo sia kafaa amana minaki nuannoo. Maasa Yisunasaimbaqa kuquafannanara miqi qidaqa.

⁸ Maasa Yisuna faqa kuqiranaki keeqaafanau-see qidaqa maasa mina faqa findifi mariraree qidaqa.

⁹ Maasa asauku mundiranara doo kuqiranakiqari findifinoo sia kafaa kuquannoo miqunara kuqirana afeeka sia kaifaa rafaafuannoo fee qidaqa.

¹⁰ Mina kuqirafa mandainaina akiaqara arirafa moodaa kari kuqunara sia kaifaa maa maqanasaqaraa mandainaina fannoo mina rafaafuannoo. Doo maasa mandainaina mina rafaafirana faqa, kuqirana faqa doo taikeenoo. Doo maqee findififa mina marirafa Anutuna faqa maridanoo.

¹¹ Innee mi irirana marasee maaqimandee iri-aqa. Maasa mandainainaki maridaqa kuqufiqa doo sia minaki maridaqa maasa faqa kuqiraua maridaqa doo maqee asauku mundirana Yisuna faqa kuqiranakiqari findi fiqa mina faqa Anutuna kaqi mariranaki maridaqee qidaqa.

¹² Minara maqee manda marira nirana fannoo sia maasa qifaaqa rakisiqimaqaannoo, qaoo qi-

aqa. Sia maasa faiqí faiqi manda nidiranamau fuaqa.

¹³ Manda oosana moo inni qumarainaqa sia in-niqa nifaaqa minakina eedoo qimasee quqaqa. Sia miqiaqa maaqiaqa, innee kuqiranakiqari findifi mariasara foora aiqama nifaaqa eedoo qimasee Anutuna aramandunnai rumafifanoo mina inni nifaaqa mareeqeenoo narí andeeqara saikaki quqaanifeera mina aramandunnai in-neeqa nifaaqa quqaqa.

¹⁴ Maqee innee sia Mooseena sandufa ni-maarusira ufa ameemaanai mariafanoo innee Anutuna afaarirana ameemaanai mariafanoo minara mandainaina fannoo sia inni rafaqa fuannoo.

Andeeqara oosanaki rumbaqa maridaqa.

¹⁵ Maasa sia Mooseena sandufa nimaarusira ufa ameemaanai maridaqa Anutuna mandainaina minnisara afaarirana ameemaanai maridaqara qiqa manda oosanaki kaqi qifaaqa quqasee maraanauree. Oo sia uqanna.

¹⁶ Innee maanara iridaqa maasa Yuda maqannaa ooqeenaa oosana irimariafanoo, maasa akaqausa karafusara foora moo fasiqa qeeqa qifaaqa amisee mina ainaina auqamaisaidaqa. Yafasiqanee ainaina maisaanauree, mi fasiqana qeeqa qifaaqa mina aramandunnai quqasaanoo mifa qini rakisi qimaqainaqa mina ufara eedoo kai qianauree. Qinee manda oosanara faqa Anutuna ufa iriranara faqa miqandara qidaqa. Inneeqa nifaaqa mara maree manda oosana ameemaanai quqasaifanoo inni mareeqeenoo

kuqiranaki quqannisaannoo, miqooqari mina dinni Anutunai ubeekamafi minufara eedoo qimasaifanoo mifa narí andeeqaranaki quqannisaannoo.

¹⁷⁻¹⁸ Oo Anutunara dufi dufi qiaqa. Innee ooqai mandainaina ufa ameemaanai marusa mariafanoo maqee innee inneeqa aiqamausa naundurannai qinee Pauroosa qimannimuna naamuqira anoona ufa ameemaanai mariafanoo minara innee manda rumbaranaki marufanoo Anutufa idukunnisoofaqa mina andeeqara rumbaranaki fuafanoo.

¹⁹ Inneeqa faiqí faiqi sia afeeka irirana faqaasa mariasa mariafaqa qinee Pauroosa kaqi maa ufana inneeqa irimariana amana kai qimannimianaqa iriaqeera qimannimidaqa. Ooqai innee inneeqa nifaaqa faiqí faqa anaasee faqa nariara nariara fanandirana faqa oosana oosana mandainaina faqa moo faqa moo faqa aaku aakummafafaqa mariafanoo mina aramandunni kai inneeqa nifaaqa quqasaafanoo doo maqee miqi kai iqa inneeqa nifaaqa aiqama andeeqara oosanamau fimariana aramandunni quqasee maqeeidaqa naaquqara andeeqara mariranaki mariaqeera.

²⁰ Ooqai innee manda oosana rumbaranaki maridaqa sia andeeqara ummaara ameemaanai mariqau sia minara irimariafanoo.

²¹ Mi manda ummarafa ooqai mariunara maqee nisauri mariafanoo. Innee mi mandainainaki maridaqa minakiqari nanee moo amiqira ainaina mareeusee. Maqee minara iriseeqa ooqai maraafannainainara

nisaurirainaina maraƣiafanoo qidaƣa. Mi manda oosanamau fiifiufa kuƣiranai kai ubeekee marinau.

²² Doo maqee innee mandainainakiƣari iduƣiƣa mariafanoo Anutuna rumberanaki keeqafi mariafanoo. Doo innee miƣiunara inni mari-rafa aiƣama doo minaindi kakai mafi mariinaƣa taikara aukwana innaarunai marirana inni nimi-annoo.

²³ Dinni manda oosana fannoo narí ainaini-mariasa naarama ƣuƣaseenoo narí ainainirana akiaƣara feefauru nimidanoo mi feefaurufa kuƣi-rafa kai maridanoo. Kafaa mina dinni Anu- tuna kaƣi nimira ainaina innaarunai naaru mari-rafa sia ainainirana akiaƣara maridanoo, mina asauku mundirafa maasa karaambaiƣa Yisufa mina faƣa moodaanaki kiƣa maridaƣa mina namufaƣa innaarunai naaru marirana kaƣi nimi-rafa mariannoo.

7

Mandoosanakiƣari maqee Yisuna findifiranaki maridaƣa.

¹ Oo qini ƣikaƣaafasaa Roomma maƣanna mariasa ƣinee Pauroosa maqee ufa ƣimannimi-rara innee amiƣimasee irimaru ufana ƣimanni- anaura. Faiƣí anaasee sandufa faƣa Mooseena sandufa faƣa faiƣí anaasee kuƣiƣa mi sandufana sia irifarannoo. Kaƣi maru kamuƣoo misa mina irisee mina ameemaanai maridaƣa.

² Nimundara fasiƣa anaaseera foora sanda ufa ameemaanai maridaƣa. Mi anaaseena afaaƣi kaƣi marinannoo mi anaaseefa narí

afaaqindiri sanda ufa ameemaanai maridanoo narí afaaqisaa atooqanoo mariannoo, afaaqi kuqu finanoo mina anaaga fannoo kaqi fifau mariannoo sia sandufa ameemaanai mariannoo sia narí afaaqisaa atooaannoo.

³ Mi anaaseena afaaqi kaqi marinanoo quandaki moo fasiqa marainnanara qummuarimari anaasee fee qifaranoo. Mina afaaqi kuqufinanoo sandufasaaqaraafa doo idukinoo maridanoo, quandakinoo moo fasiqa marainnanara sia minara ummuarimari anaasee fee qifaranoo.

⁴ Doo innee qini qikaqaafasaa innee faqa Mooseena sandufa ameemaanai mariasa doo innisaimbaqa qifaaqa fannoo Yisuna saimbaqa kuqinuu. Doo mi kuqiranakiqari mina Yisuna namufaqa findifiqa minaindikiqa Anutuna ainainiranaki andeeqasee anoona ainaina imarinakina mariaqera mariafanoo.

⁵ Ooqai maasa qeeqa faiqí faiqi iriranamau manoo manaa iqa fimariafananoo Mooseena sandufa anireenoo maasa manda oosana afaurameeqee mara uqeera kikiqa maseenoo quandakinoo mareeqeenoo kuqirana ameemaanai quqaqisanau. Minara Mooseena sandufa ni maarusira ufa fannoo maasa karafusara foora rumbaqaqanau.

⁶ Doo maqee iriaqa, maasa Yisuna faqa kuqiara foora iqa maridaqa maasa karafusa rumbaqa marianasaaqari idukuaki maridaqa sia kafaa ooqeenaa mariranaki fuanaura. Maasa Mooseena sandufamau fuannana mifa maasa mandainaina mara uqeera quqaannoo minara mi mau sia fuanaura, fukamau Anutuna

maraquna aatata fuanaura.

Sandufa fannoo paqurimma qimifaqa qeeqa mandainaina kaqi maraidaqa.

⁷ Minara maasa Mooseena sandufara mandainainafee qianauree. Oo sia miqinoo maridanoo. Mooseena sandufa innee moosa ainainara sia nimuqusianifee qidanoo sia miqinoo marinaqa qinee moosa ainainara qimuqusimarina mina aaqee unoo qunara sia irini mana mana kaimmunaiqini. Minara Mooseena sandufakinaafa doo kooroomandee mandainainara qimaqimifaqa qisauriqa.

⁸ Mooseena sandufa fannoo moosa ainainara sia nimuqusiaqee qinoo marifanoo qini manda irirafa irisee quandakinoo firaqoo moosa ainainara amuqusidanoo. Minara sandufa sia maru kamuqoo mandoosanara oonumafi irirafa kuqinoo marufaqa mana mana imariafannana.

⁹⁻¹⁰ Mooseena sandufa sia maru aukwana sia faiqi anaasee narufaqa sia kuqiyara foora imariqau kaqi maridaqara foora imariqau. Mooseena sandufa nimaarusira ufa kambiqafufaqa misa naundurari manda oosana uqeera niminoo narinau. Miqimandaifanoo Anutuna kaqi marira nimira ufa fannoo kuqirana kai niminoo.

¹¹ Misa naunduraki mari mandainaina fannoo misa narirara rakisinoo marifanoo Anutuna sandufa aniraifanoo mina qumareenoo minannai misa naru quqeenoo.

¹² Mooseena sandufa faqa Anutuna naamuaqira ufa faqa andeeqarafa naaquqarafa amiqirafa maridanoo.

¹³ Amiqira ainaina fannoo fee misa kuqa narinoo fee qianauree. Oo sia miqinoo maridanoo. Misa naundurakinaa mandainaina fannoo kai amiqira ainaina mara mareenoo minannai misa narinoo. Miqi mandainanoo misa naundurakinaa anoona mandainaina akooqoo kooroo ianifeera miqinoo. Doo mi mandainainafa Mooseena sandufa saaqari innooqeenoo firaanaikinoo maridanoo.

Maasa qiqa daunduraindaraa irirafa oonu rarisee ani rarisee idanoo.

¹⁴ Qinee Mooseena sandufara kuqaa innaarunaindaraa ainainee qidaqa. Qini daundurakinaa mandainaina fannoo ainainira fasiqara foora qini feefaurummeeqeenoo nararamandunna quqaqisaqaisa mina rumbara saikaki maridaqa.

¹⁵ Qinee mi saikanaki maridaqa qeeqa auqee marunna saikoosanara faqa sia iridaqa. Qinee amiqira oosanara didimarina marararee qidaqa sia maraيداqa. Qinee dapi manda oosana fidi-aqaaira oosana kai maraيداqa.

¹⁶ Qini irirafa qikooqeemari mandoosanna maraيداqa Mooseena sandufa fannoo qiniara aaqee mariifoo qimasai fanoo qini irirafa faqa mina irirafa faqa moodaaqoo apinoo marifaqa. Oo Mooseena sandufara anoona mariifoo qidaqa.

¹⁷ Miqidaqa sia qeeqa maraqunafau mi manda oosanna maraيدau. Mandainaina fannoo qini daundurai marifa mifa qini qifeeqaraifaqa mi manda ainainna maraيداqa.

¹⁸ Qeeqa daundurakinaafa amiqira oosanna maraannee qifaqa qini irirafa anuqidanoo sia

amanaikidanoo. Mina iridaqa maaqi qidaqa qiqa faiqi faiqi qimuqusaki amiqiroosanna sia minaki marifanoo fee qidaqa.

¹⁹ Amiqiroosanna auqararee qimasaidaqa miqooqari quandakifaqa qikooqeemari mandoosanna kai auqaidaqa.

²⁰ Qinee qini qikooqeemari mandainaina auqaananoo sia qeeqafau auqaidau qini daundurakinaa mandainaina fannoo mina auqaidanoo.

²¹ Qinee amiqira ainaina iraree qunanoo mandainaina kai qini doorinni aniraifaqa mina kaimma auqaidaqa. Mi sandafa kai qini daundurairirana qimidanoo.

²²⁻²³ Qini qimuqusa ookina Anutuna sandufara asaidanoo qiqa qifaaqaki mari manda ainaina mifa kai qini raineeqeenoo narí rumbaranaki quqaidanoo.

²⁴ Qiqa manda qifaaqa fannoo qiqa daundura mareeqeenoo kuqiranaki quqaidanoo. Oo qinee nanaree kaaqa mandainainaki maridee firaqoo doori runidee. Qeeqa qifaaqa qimana namufaqa kuqiranaki fuananoo yafee aniree minakinaana qini qimana mareeqee kaqi naaru mariranaki quqaqisaannoo fee.

²⁵ Oo dufi dufi Anutufa narí asauku mundirana Yisuna maasa karaambaiqannai qini mareeqeenoo naaru mariranaki quqaqisaannoo. Doo maqee qinee minara maaqi qidaqa. Qini marirafa maaqimminoo maridanoo qeeqa qimuqusa daundurakinaa irirafa Yisunannai kai Anutuna sandufamau fidaqa qeeqa faiqi faiqi manda nirana marirana mandainaina sandamau fidaqa.

8

Anutuna maraƣuna fannoo maasa daunduraki dadaaqifaƣa andeeqasee maridaƣa.

¹⁻² Maasa Anutuna asauku mundirana Yisuna faƣa moodaanaki marifanoo Anutuna maraƣuna fannoo kaƣi marirana niminoo kuƣirana manda sanda faƣa manda oosana faƣa minaki marunnana idukuƣisaifaƣa maridaƣa. Minara maqee asauku mundirana Yisuna faƣa moodaanaki mariasa sia Anutuna kuƣira ufa ameemaanai maridaƣa.

³ Mooseena sandufa nimaarusira ufa sia amana maasa uqeereeqeenoo maasa faiqí faiqi maasa marirafa kudoosaapaunanoo minara sia maasa uqeeraqiseenoo. Mooseena sandufa kadiqoofanoo miqoo Anutufa moo oosanannai anoonai kinau. Mifa narí amaaku aqiqoonannai maasa faiqí faiqi naundurakinaa mandainaina arinau. Yisufa faiqí faiqi naundurakinaa manda ainaina maraƣuanifeera narí faiqí faiqi fooqaanaikamasee aqiqoofanoo quminau.

⁴ Maasakiƣari akaƣausa sia faiqí faiqi irirana-mau fimariasa Anutuna maraƣuna sandufamau fimariasa maasara Anutufa qiqafeenoo sia maasa andeeqarafa Mooseena sandufa amana ooru maridanoo, ooreeqanoo maridanoo. Anutufa mina qafamaseenoo maasa andeeqarafa Mooseena sandufa amana kai ooru fuanifee qimasee narí amaaku aqiqoofanoo quminau.

⁵ Faiqí faiqi naundurakinaa manda irirana-mau fimariasa nári naundurakinaa irirafa nariƣa rafaqafunnisaifaƣa mi mau fidaƣa. Anutuna

maraquna ufamau fimariasa maraquna aidi-mari ainainafa misa nitikuraki keeqafi rakisi qumaraifaqa mi mau fidaqa.

⁶ Faiqí faiqí nidimari manda ainainafa ani atikuraki rakisinana kuqirannai ubeekanoo maridanoo kafaa mina dinni Anutuna maraquna fannoo narí aidirafa ani atikuraki rakisinana mifa ani mareeqeenoo kaqi mariranaki faqa asoaranaki faqa ubeekama amaqaannoo.

⁷ Faiqí faiqí manda nidirafa nitikuraki rakisi-marisa Anutuna namuqaakammiqa maridaqa, sia Anutuna sandufamau fidaqa, fidaqau sia amanaikiaqini.

⁸ Nári faiqí faiqí iriranamau fimariasa sia amana Anutuna aidiramau fifaranoo.

⁹ Innee Roomma maqusai mariasa qini qikaqaafasaauga innee sia miqimariasa Anutuna maraquna fannoo innikina marifaqa innee sia faiqí iriranamau fimariasa mariafanoo innee maraquna ufamau fimariasa mariafanoo. Asauku mundirana maraquna siaifa sia minaindi maridanoo.

¹⁰ Asauku mundirafa inni naundurái namum-maqainaqa mina maraquna fannoo inni nifaaqa mandainaina fannoo narinoo marinnana sia minara iridanoo qafaidanoo Yisuna kuqiranara iriseenoo kaqi marirana inni nimana kaqi nim-idanoo.

¹¹ Anutuna maraquna fannoo Yisufa kuqiranakinaana marafindifinau. Yisuna mara findifu maraqunafa kai inni faiqí nifaaqa kuqiqa marifanoo kasooqaqee mi kuqirana

uqeereeqeenoo kaqi marirana nimiannoo, nari maraquna inniki marinnanannai miqiannoo.

¹² Oo qini qikaqaafasaauga maasa moo umaara ameemaanai maridaqa maasa faiqi faiqi manda nidirana ameemaanai sia maridaqa. Yisuna maraquna ummaara ameemaanai maridaqa.

¹³ Innee maqee faiqi faiqi iriranamau fiqa doo kuqifaranoo. Anutuna maraquna ufa irisee minannai innee inneeqa manda oosana kuqaruseeqa innee sia kuqifaranoo kaqi marifaranoo.

¹⁴ Anutuna maraquna fannoo nifiqee fimarisa Anutuna faiqi namu maridaqa.

¹⁵ Anutufa nari nimimari maraqunafa sia inni manda rumbaranaki quqaseenoo rufiarana nimiannoo, mifa sia miqidanoo maaqimmiannoo inni mareeqeenoo inni Anutuna faiqi namu kammasainaqa mina afeekannai kai qifaaga quqasee maasa Anutunara maasa qikoonee qidaqa.

¹⁶ Anutuna maraquna fannoo aniree maasa qeeqa maraquna minasaa ootupamasaannanara maasa maraquna qimamida maaqi qidanoo innee Anutuna faiqi namu mariafanoo fee qidanoo.

¹⁷ Anutufa nari faiqi aanaaseera amiqi amiqira ainaina afeeda maqimaqaina maasa mina faiqi namu marianara minara maasa mifa innaarunai quqannimaqaaqai qumiasana kasooqagee maraanaura. Anutufa nari asaku mundirana amaaqaaqai qumiasana faqa maridanoo mifa mina faqa maasa mirinni innaarunai naida qimiannoo. Maqee maria aukwana asaku mundirana kuqira aupurarana

dadaaƙi maraananoo innaarunai mina kaaƙa areenarana faƙa naida qimiannoo.

Maasa aupuraranaki maridaƙa Yisuna kaaƙa qarana afeesida maridaƙa.

18 Maƙee mari aukuaana Yisuna kuƙu aupurarana dadaaƙi marainafa faƙa maasa oosana oosana ummaara marainnana faƙa kaƙiikaafa maridanoo, kasooƙaƙee innaarunai naŕi areenarana naida qimianinafa ƙafaananoo firaafa uƙanna mariannoo sia maƙee aupuraranara ƙianaara fifau ainainara foora maridanoo.

19 Anutufa auƙu ƙuƙoo ainainausa innaarunaindaraana faƙa maƙasaƙaraana faƙa mi ainainausa aiƙama moodaanaki kaaƙa aupurarana maridaƙa Anutuna faiqi namu faiqi faiqi misa kuƙiranakiƙari findifiranara afeesidaƙa. Misa kaaƙa firaƙoo minara afeesida maridaƙa. Maasa Anutuna faiqi namu saimbaƙa putaa iranakiƙari idukuaƙee qimasee kaaƙa afeesidaƙa.

20 Innaarunai faƙa maƙasaa faƙa mari ainainafa aiƙama putaa inoo mandaikinoo rakeeinoo madaapeekammidanoo. Sia naŕi kai miƙidanoo Anutufa naŕi qimaƙoomau fidanoo miƙidanoo. Anutufa minauƙa faƙa faiqi narira ufa ameemaanai ƙuƙaƙoosa maridaƙa madaapeekidaƙa. Mi putaaŕa marirafa ƙumaarandanoo maridanoo mina aufadara ufa faƙa maridanoo maaƙimminoo maridanoo.

²¹ Aiqama mari ainainafa narí putaa kiqari kasooqagee idukufuannoo. Idukufinoo Anutuna faiqi namu nári idukiranaki faqa idaaqira areenaranaki faqa keeqafi moodaanaki marifaranoo.

²² Oosanasaaqari aiqama Anutufa auquqoo ainainafa anaasee inaamunai aupuraida ikiraqee marianara foorá maqee putaa irafa ummaarandanoo maridanoo.

²³ Sia auquqoo ainainafa kai aupuraidanoo maasa faqa qeeqa faiqí faiqi manda marira nirana aupurarana aupuraidaqa, kasooqagee Anutufa firaa qumiasana maasa innaarunai qimiannoo, maqee oosana arasee nimira ainaina narí maraquna nimiqoosa maridaqa. Maasa Anutunara afeesidaqa aupuraidaqa mifa maasa aiqama qipatasaa marirana iriranakinaana idukusainaqa narí faiqi namu kamambiqa innaaruna ququsaki mariaqeerá minara qeeqa faiqí faiqi manda marira nirana aupuraranara aupuraida afeesida maridaqa.

²⁴ Maasa Yisunasaa irirana rusiseeqa minara asasammasee afeesidaqa minannai innaaruna asumu marirana mareeqa. Asasamandee afeesimaria ainainafa anirainaqa qafamasee maasa sia afeesianaura. Sia moo fannoo narí qafeemari ainainara afeesidanoo, doo ani maridanoo.

²⁵ Maasa sia qafaa ainaina kambiqaan-noommifoo qidaqa ubiqafi reendeenamandee asasamasee afeesidaqa.

²⁶ Miqikai inoo Anutuna maraquna fannoo anireenoo maasa Yisuna saqarikiranara kudoosaapee mariasa dadaaqidanoo. Maasa

nana innaaru fee qianauree qimasaidaqa nana ainaina kikiqususaidaqee innaaru qianauree qimarufanoo Anutuna maraḡuna fannoo maasa ooreeqara innaaru qirana qafeenoo innaarunai ooru maasara Anutunai firaaqoo dadaaqidanoo pisoopisoo mandee innaaru qidanoo, faiḡí faiḡi ufa sia amanaikifanoo ammaḡasaidanoo firaaqoo Anutufinnai maasara innaaru qidanoo.

²⁷ Anutuna maraḡuna fannoo Anutuna faiḡí aanaaseera Anutunnai firaaqoo pisoopisoo mandee innaaru qidanoo, sia fifau, Anutuna iriramau kai misara innaaru qidanoo. Anutufa faiḡí nimuḡusaki mari ainainara faasai qafee marifa marinara maraḡuna ireefandinna ainainara faḡa faasai iridanoo moodaa irirana marinara maraḡuna maasara ireemari ainainara iridanoo.

²⁸ Maasa maa iriranna iridaḡa faiḡí faiḡikinaana narí asumu mariaḡeera qimasee narí rusandeesamumandee maroosa Anutunara nidimarisara Anutufa misaḡaa rakisidanoo oosana oosana ummaara mandainainna misaḡaa quḡemarina misa dadaaqida fee qidanoo misaḡaa quḡaidanoo.

²⁹ Anutufa faiḡí faiḡikinaana rusandeesa-mumandee maroosa sia fifaufau maranau. Misa narí amaaku Yisunaikamambi mifara foora mariaḡeera misa rusandeesamumasee mareeḡeenoo utaaḡama nimaḡasoofaḡa mariḡau. Miḡimasainanoo Anutuna amaaku fannoo moomoosa maḡasaaḡaraasa mina akaḡaafasaara foora maridaḡa mifa misa ooḡu faiḡí nifasaafara foora mafinoo marianifeera utaaḡamma amaḡanau.

³⁰ Anutufa narí maraqaosa naaramasoofaqa aniroofanoo mareegeenoo narí mariranaki quqanau. Anutufa sia fifau naarama quqanau, naaramasee narí afusaa andeeqaranaki quqanau, minaki quqaseenoo innaarunai kaaqa areenarana faqa naida niminau.

Sia moo ainaina maasa Yisunasaqaraana amana rakee iannoo.

³¹ Maasa maa ufana aiqama irisee Anutunara naqi fee qianauree. Anutufa maasa dadaaqi-marifa marinanoo yafee maasa amana rafaqa fuannoo. Sia amana moo fannoo maasa amana rafaqa fuannoo.

³² Anutufa sia narí amaakuara irinau kaqi maasara qimudao qimasee kuqiranaki quqanau. Mifa narí amaaku uqanna ririmma kaqi qiminau nana ainainee moo ainaina sia qimiannoo, aiqama ainaina kaqi afaarida qimiannoo.

³³ Yafee Anutufa rusandeesamumasee maroo fasiqa aanaaseera mandainainara qimammaree nifairiannoo fee sia moo fannoo miqiannoo Anutufa narí uqanna misara mandainaina siaisee qidanoo.

³⁴ Yafee moo fannoo mina faiqi namu kuqira ufa nimiannoo fee. Sia moo fannoo amana miqiannoo. Anutuna asaku mundirafa Yisufa doo kuqufufanoo Anutufa kuqiranakinaana mara findifumasee kaqi mariranaki quqasaifanoo doo maqee Anutuna aaqa asaku uqannai maridanoo maasara Anutuna oorisa innaaru qidanoo.

³⁵ Yafee moo fannoo asauku mundirana amuqusiranakinaana maasa rakeemasee kaqinni quqaannoo fee. Sia uqanna moo fannoo amanaikiannoo. Amanee mandainaina oosana oosana fannoo mina amuqusiranakinaana rakee iannoo fee qimuqusimari ummaara fee amanee Yisuna amuqusiranakinaana rakee iannoo fee Yisuna ufasaara narirafa mifee amana rakee iannoo fee. Aararee marinee amanee rakee iannoo fee kudikira fee rakee ianno fee ariranara deedaqirafa amanee rakee iannoo fee kuqirafa amanee mina amuqusiranakinaana rakee iannoo fee. Sia moo ainaina amana rakee iannoo.

³⁶ Tamummaqara fasiqa akaraki minara maaqi qidanoo.

Maasa Anutuna ufamau fimariasa faasaambaasaana aiqama kari Anutunasaara dariranara eerairidaqa. Anutuna ufa siaisa misa maasa kuqiranaki fimaria sipsipausara foora maasa maaqimma qidaqa, kuqa dariraridaqa.

³⁷ Tamummaqara fasiqauqa miqi qimaqoofaqa qinee Pauroosa mi aiqama ainainausara qinee maaqi qidaqa. Sia moo manda ainaina fannoo Yisufa maasara amuqusiranakinaana ani mara rakee iannoo mi mandainaina oosanna oosannafa maasa darirari marifanoo mi dariranna sia rafaqafuannoo. Maasara amuqusimarifa asauku mundirafa maasa mareeqee uriqararanaki quqaqaisa maridaqa.

³⁸ Qinee Pauroosa maa ainainnara amiqimandee mapukusee iridaqa, sia moo innaarunaindaraa rakisira fee moo afeeka

fee maqee mari ainaina fee kasooqaqee
kambiqaaninna ainaina fee kuqa dariranee
kaqi mariranee.

³⁹Innaarunai mari ainaina fee maa maqanasaa
mari ainaina fee, Anutufa auqu quqaqoo
ainainakiqari sia amana moo ainaina fannoo
Anutuna amuqusiranakinaana ani qumaree
rakee iannoo. Anutuna asauku mundirafa Yisufa
maasa karaambaiqa fannoo maasa mareeqeenoo
minaki quqaqaisa maridaqa sia moo ainaina
fannoo minakinaana ani qumaree rakee iannoo.

9

*Pauroofa Isaraee maqannaasara qimudaao qi-
danoo naiki raqeenoo qimanimu ufafa.*

¹Qinee Pauroosa anoona ufa kai qimannim-
idaqa. Qinee asauku mundiranaindi maridaqa
sia unna ufa qimarunausa maridaqa. Qini daaki-
rafa Anutuna naaquqara andeeqara maraquna
fannoo mifa rakisimarifaqa sia qinee unna ufa
qianaura. Qinee qeeqa maqannaasa Isaraee
maqannaara qimannimianaaura.

²Misara firaqoo qimuqusimarifaqa
qikiraqaidaqa qeeqa maqannaasa qeeqa moodaa
qimaqi moodaa fidika rainarausara miqidaqa.
Misa Yisunara sia fee qimasee arunara oonumafi
iriqa ikiraqaidaqa.

³Misa Isaraee maqannaasa asauku mundi-
ranasaaqaraana rakeemmiqa maridaqa. Anu-
tuna narira ufa ameemaanai marianara qinee
rakeemaseeqa minni misa nimaqa maqaanaqa

misa aiqaree asauku mundiranasaa atooqafiqa naaru kaqi mariranaki mariaqaana.

⁴ Misa Isaraee maqannaasa Anutufa aiqama maqannaasakinaana rusandeesamumandee Isaraee maqanna maroosa mariafanoo, Anutufa misa mareeqeenoo narí faiqinamukamasee narí areenarana raina nimigoosa mariafanoo. Anutufa narí moodaanaki kira ufa oosana oosana moomoo nimiseenoo narí sandufa faqa Mooseenasaa quqasoona faqa nimirau, misa Anutuna amooqirafa anoonamau fimariasa, misa Anutuna qima afeekaikira ufa moomoo maree marusa.

⁵ Misa ooqeenasa faiqi nuqufaqaasa Abara-haamana faqa Isakeena faqa Yakooboona faqa misauqa faiqi namu niku nisauku mariasa, misa asauku mundirafa mi maqannaasaki qumu kam-biqafufaqa moodaa maqanna marusa mari-daqa. Anutufa aiqamausara rakisidanoo, naaru naaru mina amooqiaqa. Kuqaa.

⁶ Qinee Isaraee maqannaasara irisee sia Anu-tuna qima afeekaikira ufara kadiqee maqi qi-daqa. Anutufa sia aiqama Isaraee maqannaasa rusandeesamumandee narí faiqi namu mariaqee qimasee maranau.

⁷ Abarahaamana aiku asauku atiuqa faqa sia aiqama Anutuna aiku asaukukiqau. Minara qi-daqa, Anutufa maaqi qimasee Abarahaamana qimaminau. Ani faiqi namukinaana Isakeena aiku asauku kai ani aiku asauku fee qianaura.

⁸ Mi ufana Anutuna qimamira ufara qinee maaqi qidaqa. Abarahaamana dapi anaasee Qakaarana kaqi fifau maroona faiqi namu sia

Abarahaamana aiku asauku fee qinoo mari-danoo. Anutufa qima afeekaikiranannai maqoo faiqina mina aiku asaukuara Abarahaamana aiku asauku anoona uqannee qidaqa.

⁹ Anutuna qima afeekaikira ufa maaqimminoo marinau. Qinee qeeqa andeeqara aukuana aniree Saraqana dadaaqiananoo faiqi maqaanoo.

¹⁰ Sia mifa kai, maana faqa Reebeekanara faqa qimannimianauro, Reebeekafa qaara faiqi-faqaafa marinau, miqanda nikoofa maasa qi-keeku qikaaku Isakeefa marinau.

¹¹⁻¹² Reebeekafa faiqi maqaaninnaqanda mi faiqiqanda nuqu indaruqaa faiqi auqu Eesaufa mariannoo fee qinau. Mina innaaqianna maqaaninna faiqina auqu Yakooboonee qinau. Miqanda sia kambiqaraqoo Anutufa indaruqaa faiqiara innaaqianaa faiqi mina ainainamma aisaaninna fee qimasee afaaqooqa qinau. Sia miqanda kambiqaqqa maridaqau mandoosana fee amiqira oosana fee maraidammiafoo qimaseenoofau mi ufana quqanau. Anutufa moodaa maroo oosanafa Anutufa miqandara afaaqooqa quna sia nariqaqara oosanasaarau afaaqooqa qinau, nari irirana aidiranasaa munduanifeera indaruqaafa Eesaufa quandaki innaaqianaana mina ainaina maisaannoo fee qinau.

¹³ Ooqeenaa akarakinaa ufa maaqimminoo minara maridanoo.

Qinee Yakoobonara dididanoo Eesaunara qikooqaidanoo fee qinau.

14-15 Miqandara irisee Anutunara naqi fee qianauree Anutunara sia andeeqee maqi qianauree. Oo sia uqanna miqi qianaura andeeqanoo marifa Anutufa maaqi qimasee Mooseena qimaminau.

Qinee qeeqa iriranannai kai faiqi anaasee akaqausa narusee akaqausa nifauaanaura, qeeqa iriranannai kai akaqausara qimuqusianaqa marasee amiqi amiqianaura.

16 Minara aiqama ainaina sia faiqi nidiranasaa mundinoo maridanoo Anutuna amuqusiranasaa mundinoo maridanoo.

17 Ooqeenaa akaraki Mooseefa Faraona maaqi qimasee qimaminau.

Qinee Anutusa ani Faraona mareeqee Isipa maqannaa karaambaiqai kianneera quqaqiafana, qinee Anutusa ani Faraofa qini ufa rukioonara ani kuqaruanaura. Minannai qinee qeeqa afeeka faqa qeeqa duqu faqa aiqama maqa maaqa afaaqasasa mariasa iriaqee qimasee ani quqaqiafana.

18 Doo maqee maasa mi ufana iriseeqa Anutunara maaqi qidaqa. Anutufa nari kai irisee akaqausara amuqusifanoo amiqi amiqimmidanoo kafa Anutufa nari kai iriseenoo akaqausa ufa rukiara oosana nimidanoo.

Anutufa maqa qafeera foora maasa auquqisanau.

19 Innee mina iriseeqa quandaki maaqi qimasee aaqamasee qini qimaqimifaranoo.

Ani ufa miqinoo marinaqa maasa mandoosana maraananoo naqimasee Anutufa maasara aaqee mariasee qiannoo fee. Naqimasee maasa Anutufa auquqisoo mandoosanara iriseeqa rakeemaki amiqira oosanamau fuanauree.

²⁰ Qinee mina iriseeqa maaqi qimasee ani qimamianauro, Anutufa aniara aaqee mariaanoo qimasee afairirana anee yafee maridanee quandaki narí qimaminnaree anee kaqikaafa mari-ananoo. Qafee auqiranara iria. Faiqí moo fannoo maqa maraseenoo qafee auqimarifanoo mi qafeefa sia quandakinoo mi fasiqanara aqidanoo anee nanaree qini maaqimmasee auqidanee, sia qafee fannoo miqi qidanoo.

²¹ Mi fasiqafa qafee auqimarifa narí iriranannai kai maqa qumaree turi iseenoo atakuseenoo mi maqana rainasee akaqana qumareenoo narí iriranannai kai amiqirana akara rirana auqidanoo kafaa mina dinni ati quqaqoona raina qumareenoo narí iriranannai kai moo kaqi dapi qafee kai auqidanoo.

²² Anutufa miqikai maseenoo maasa auquqimaqanau. Maasaki akaqausa manda qafeera foora maasa akaqausa auquqimaqaseenoo idaki fifandinausee qidanoo. Sia aaqee kai minara naruannoo naaru kasooqaqee mina aki-aqara naruannoo. Kisaqasaa narí aanoo irana rafaqafusee mari inanoo naaru naruannoo. Miqoo narí aanoonnai faqa narí afeekannai faqa miqoo mandoosana maree mariasa kuridi ni-maqaannoo.

²³ Kafaa mina dinni amiqira qafeera foora kasooqaqee maasa mina kaaqa areenarana

mareefandinausa akaqausa auquqisanau, mina amuqusa maasa ubeekanoo marisa maasasaa kai mina idaaqira moomoo areenarafa kooroo ianifeera maasasaa nammariara foora narí areenarana adiannimaqanau.

²⁴ Doo maasa daaree mariasa doo misa kai doo maa maridaqa sia Yuda maqannaasakiqari kaifau, aanaamurukiqari faqa Anutufa daaree marisa maridaqa.

²⁵ Ooqai tamummaqara fasiqa moo auqu Qooseaafa mifa minara maaqi qimaqoofa. Sia qeeqa maqannaasa naarama quqasee qini faiqi anaasee fee qianauro. Qini qikooqeemari maqannaasara qinee quandaki misara qini didimariasee qianauro.

²⁶ Akaqausara innee sia qini faiqi namu fee qimaria maqusakinaasa doo qimaria maqusanaasara kai misara kaqi marira Anutuna faiqi namu fee qifaranoo.

Doo Qooseaana ufa miqinoo maridanoo.

²⁷ Isaiaafa Israaee maqannaara maaqi qimasee akara rinau.

Israaee maqannaasa nukuda moomoora foora iqa mariafanoo misakinaana Anutufa oodaa kai mareeqeenoo asumu mariranaki quqaannoo.

²⁸ Mi aukuanna mikari Anutufa dauni dauni mandainaina akiaqara marasee aiqama maqannaasa minannai naruannoo Anutufa faiqi aanaaseera kisaaqasaa nifeesida mariranasaa doo taikeefoo qimasee aiqamausa tautumasee naruannoo. Minara Israaee maqannaasa oodaa

kai Anutuna saqarikamandainanoo oodaa kai asumu mariranaki mara quqaannoo.

²⁹ Isaiaafa kafaa Isaraee maqannaara maaqi qimasee akara rinau.

Karaambaiqa uriqararafa sia maasa ati oodaa mara quqasainanoofau Soodooma maqusa faqa Koomoora

maqusa faqa naanna ramaseenoofau aiqama taikasani, daridanoo oodaa mafi quqasoosa qaaramoo maridaqa.

Isaraee maqannaasa Yisunasaa faandi ooniara maqi farindamaki aqu fiqau.

³⁰ Doo minara maasa naqi fee qianauree. Maana kai qianauree. Anaamuru mariasa sia Anutuna afusaa andeeqaranaki keeqararee qidaqa sia amani mariasa doo misa narí irirana Yisunasaa rusisee minannai mina andeeqaranaki keeqafi maridaqa.

³¹ Misa miqiaq marifanoo Anutufa rusandeesa-mumasee maroo fasiqanaaseesa Isaraee maqannaasaa misa Mooseena sandufakiaqa randasee mi iriranannai Anutuna andeeqaranaki fuanau-ree qidaqa aana sia minaki marinara sia irirai munari minaridaqa aaqamaki kaqi runnambiqau.

³² Naqi fee mandee sia paquriqau. Misa Anutufinnai firana nári kadaapirirasaa kai mundinoo maridanoo sia saqarikirafa minasaa mundinoo maridanoo. Misa anoona aana Yisunamau fimarianara qaoo qimasee Yisunara oonisaara foora niku amaki saamuriqau.

³³ Ooqeenaa tamummaqara fasiqa akarauqa mi ooninara maaqi qiqau.

Qinee Anutusa mi oonina Sioona maqusai quqaaanaqa faiqí anaasee mi ooninasaa niku rupaurifaranoo. Faandi ooni miqirana qinee mi oonina quqasaanaqa minasaa farindamaki saamurifaranoo. Moo fannoo narí irirana minasaa rusiqainafa sia kadooparaannoo.

Tamummaqarausa Yisunara miqimmasee ooqai akara riqau.

10

¹ Oo qini qikaqaafasaaauqa Roomma maqusai mariasa. Qeeqa qimuqusa ookiqari qeeqa maqannaasa Isaraee maqannaasara Yisufinnai aniree mina asumu marirana maraaqeeru firaaqoo qimuqusidanoo. Qinee Pauroosa misara Anutufinnai firaaqoo innaaru qidaqa.

² Misa Anutunara aidiranaki keeqaranara rirafa firaaqoo marifaqa qinee nindafaunaqa sia anoona iriranamau fida Anutunara ridaqa, kaqi runnambidaqa.

³ Misa Anutufa faiqí mareeqeenoo narí afusaa andeeqara oosanaki quqaranara sia irimariafaqa nariqa kai narí firoosana nariqa kai uqeerasee mi mau fidaqa, sia Anutuna andeeqaranaki firaria oosana iriseeqa sia mina ameemaanai keeqaidaqa.

⁴ Anutuna asauku mundirafa Mooseena sandufamau Anutuna andeeqaranaki amanimariana aru taikeenoo narí Yisunasaa naaqoo rusimariasa kai Anutuna andeeqaranaki keeqaidaqa.

Asumu marira ufa sia nianai maridanoo, daaqa maridanoo.

⁵ Anutuna andeeqara oosanaki faiqí finara maaqi qimasee Mooseefa akara rinau. Faiqí moo fannoo aanaaqisaa findifunakiqari andeeqasee Mooseena sandufamau fidanoo sia moo kari aaqainafa amiqisaa finafa kuqinoo innaaruna asumu marirana maraannoo.

⁶⁻⁷ Kafaa miná dinni asauku mundirana saqarikiranannai asumu marirafa maaqiminoo maridanoo. Mooseefa kafaa minara maaqi qidanoo. Innee Mooseena sandufamau fimariasa fifau firaqoo munari minari mariasa innaarunai asumu mariranaki firaree qimariasa. Innee innaarunai ooruree asauku mundiranara randasee paqurimasee afiqee qumu dadaaqianifee qimariana fifau sia amanaikimari ainainara fifau kadaapirumasee maree mariafanoo. Asauku mundirafa doo qumu marinoo. Innee fifau maqa ameemaanai oogu keeqafi asauku mundiranara paqurimandee afiqee murusaifanoo mifa dadaaqianifee qimariafanoo fifau sia amanaikimari ainainara fifau kadaapiri mariafanoo. Asauku mundirafa doo kuqiranakiqari findifinoo maridanoo.

⁸ Akara fannoo maasa inni qimannimira ufara maaqi qidanoo. Anutuna qimannimira ufa inni naaqa maridanoo inni nifaurusaa maridanoo inni nimuqusaki maridanoo. Miqimmasee Mooseefa maasa faiqí anaasee qimannimimari ufanara Yisunasaa irirana mundiranara qidanoo.

⁹ Maaqi qimasee qimannimidaqa, anee aneenna afaurunnai Yisufa kuqaa karaambaiqa

maridanoo fee qimasee, aneenna amuqusa ookiqari kuqaa Anutufa Yisuna kuqiranakinaana uqeeranau maqi qimasainanoo Anutufa narí asumu mariranaki ani mara quqaannoo.

¹⁰ Maasa qeeqa qimuqusannai Anutuna andeeqaranaki fidaqa qeeqa qifaurunnai mina kooroo iranannai Anutuna asumu mariranaki fidaqa.

¹¹ Tamummaqarusa ufa minara maaqi qidanoo. Anutunasaa irirana rusirafa sia mi rusiranarau kadooparaannoo.

¹² Mi ufana aiqamausara qidanoo Yuda maqanna faqa aanaamuru faqa sia rainarafa maridanoo Anutufa aiqamausa narí aaree mariasa dadaaqirafa maridanoo. Aiqamausa amana amana kai Anutufa narí aaree mariasa firaqoo naundura marirana amiqi amiqimannimaqaannoo.

¹³ Tamummaqara fasiqa akarakinaafa minara maaqi qidanoo. Aiqamausa karaambaiqa dadaaqianifeera aareemariasa misa Anutuna asumu mariranaki fifaranoo.

¹⁴ Naqimasee faiqi anaasee karaambaiqara sia irirana minasaa rusimarinausa aareefaree sia amana aareefaranoo. Sia karaambaiqara irimariasa naqimandee fee irirana minasaa rusifaree. Moo fannoo oonu qimanniminaqa irifaranoo sia oonuree qimannimifaqa sia irifaranoo.

¹⁵ Naqi fee maseenoo fee moo fannoo oonu qimannimiannoo fee moo afeeqaseeqa mina ati uaqeeifanoo amana oonu maridanoo qimannimiannoo. Tamummaqara fasiqa minara maaqi qimasee akara rumaqoofa maridanoo.

Amiqira fasaasa ufa maree animariasaa anirafa
amiqirafa maridanoo.

Tamummaqara fasiqa miqi qimaqoofa mari-
danoo.

¹⁶⁻¹⁷ Misa amiqira fasaasa ufa mini qiman-
nimisoofaqa sia aiqamausa iriqau akaqausa kai
iriqau. Eesaiaafa minara maaqi qimasee akara
rinau. Oo karaambaiqa maasa qimannimira
ufa yausee iriaa, akaqausa moodaa kai iriaa.
Eesaiaafa miqi qimasoofofa qinee Pauroosa mi-
nara maaqi qidaqa. Faiqi anaasee sia fifau
kaqi Yisuna saqarikidaqa, mina aufakiana naa-
ree irisee miqoo Yisuna saqarikidaqa, Yisuna
aufakiana sia fifau naaqooki kambiqaanoo,
faiqi qimannimifanoo naaqooki kambiqafifaqa
saqarikidaqa.

¹⁸ Qinee Pauroosa minara iraidaqa Yuda
maqannaasa ooqaindari sia fee Anutuna ufa
irideeaa. Eeo kuqaa misa iriaa, akarakinaafa
misara maaqi qidanoo.

Misa ufa fannoo aiqama maqa afaaqasasa Yuda
maqannaafimaruqoo daraaninau. Misa
ufa fannoo maqa dinni dinni ati munu
raquraminau.

¹⁹ Qinee Pauroosa kafa iraidaqa, Isaraee
maqannaaf Anutuna ufa iriqee iqau sia fee iriqau.
Mooseena ooqai akarakinaa ufa dauni qimaqim-
ida maaqi qidanoo.

Qinee Anutusa qumee Isaraee maqannaasa
naunduraisaiki afanaqa fifau moo
maqannaasara Anutuna ufa iridammiafoo
qimasaidafa rairai qimannimaqaidafa.
Qinee Anutusa qumee fuki faaki qunaqa

furufarira maqannaasa qini ufa irisai faqa qini faiqi namu Yuda maqannaasa mina qafamasee mi maqannaasara rairai qimasee doo mi rairai qiranannai nári faqa qini ufa irifaranoo.

20 Mooseefa miqi qimasoofanoo Eesaiaafa aranaiqi kooroomasee mi furufarira maqannaasa aanaamuruara maaqi qinau.

Qinee eedoo qimasaunaqa sia qiniara randeemaria fasiqa anaaseesa qini Anutusa paquriqa. Sia qini daaree mariasa nifusaa qinee oonu kikiqiqa.

21 Miqi qimaseenoo Isaraee maqannaasara maaqi qinau.

Qinee faasaambaasaana inni rafusira runaqa innee ufa rukieeqa kaqirunna fimaria maqannaasa maridaqa rafusiranara rufiee mariafanoo.

11

Anutufa Isaraee maqannaa asumu mariaqeera akaqausa kai maraannoo.

1-2 Qinee Pauroosa kafaa Isaraee maqannaara iraidaqa, kuqaa fee Anutufa Isaraee maqannaasara qaoo qimasee mininnisanau. Oo sia uqanna minnisanau. Qinee Pauroosa Isaraee maqannaa faqa maridaqa qinee Abarahaamana aiku asaku marunausa maridaqa, qinee Yakooboona amaaku Beesamina ati maridaqa marunnanara Anutufa sia nári Isaraee maqannaara qaoo qimasee minnisanau. Ooqai oosanaraseenoo maa maqa maaqanakina rusandeesamumandee maroosa mariafanoo.

Ooqeenaa tamummaqarausa akarakinaana Eeriaafa Isaraee maqannaasara nifairidanoo niqidanoo afeekaikamandee Anutunara innaaru qinoo qinau.

³ Oo karaambaiqa Isaraee maqannaasa ani ufara minniseeqa furufariqa ani tamummaqara fasiqauqa kuqa naruseeqa ani aandau tatufira ooni qaindauqa rapeepamma aqiqa. Qinee Eeriaasa qeeqaraa kai ani ufamau fimarunaqa misa minara irisee qini faqa kuqa dariraree qimariafaqa ani qimamidaqa.

⁴ Eeriaafa miqi qimasoofanoo Anutufa qimaminoo qinau,

Oo sia aneennara kai qini ufamau fimarianafa mariananoo. Qinee qisauku dinni taikasee dinni oonu qaaraqanda tauseenna fasiqa anaasee moomoosa uqanna utaaqamaqau-nausa maridaqa sia unna Anutuna Baara-nara innaaru qimariasa qiniara kai innaaru qimariasa maridaqa.

⁵ Eeriaana aukuana miqinoo marinau maqee aukuana Isaraee maqannaasaki miqimminoo maridanoo, Anutufa misakinaana akaqausa utaaqamasoofanoo narí amuqusiranannai utaaqamasoosa maridaqa.

⁶ Minamusa Anutufa sia misa nirana marirana oosana qafamasee amiqira fee qimasee utaaqamannimaqanau, narí amuqusiranannai kai misa utaaqamannimaqanau. Anutufa faiqí utaaqamannimaqara oosana fannoo misa nimariana misa mariranasaa mundinoo marinanoofau sia

anoona amuqusiranasaa mundinoo marini, minasaa kai mundinoo maridanoo.

⁷ Isaraee maqannaasara nanee fee qianauree, maaqi qianauree, Isaraee maqannaasakinaana akaqausa Anutufa utaaqama nimaqagoosa kai Anutufa naaroo ufana irisee mifinnai fiqau. Aiqama tia naaqooki ooni ititarausa maridaqa sia nári randee maru aanna paquriqau.

⁸ Tamummaqara fasiqausa misara maaqi qiqau.

Anutuna nimuqusaki faqa nitikuraki
faqa ummaarararana nimisoofaqa
mi kamuqooqari aunduaridaqa
kudoosaapaida maridaqa nifu qafaida
sia qafaidaqa, naaqooki faqa sia iridanoo.

⁹ Dafidifa faqa maaqi qimasee misara akara rinau.

Misa qoomaqa sakasee ooqu marififanoo namuqaa anireeqa misa ititaannoo. Misa miqoo kuridiqa nári mandainaina akiqara mareefara.

¹⁰ Misa sia qafaaqee qimasee Anutufa misa nifusaa ititaannoo. Nári ummaara fannoo aiqama kari nári nitaufakaaga mariraika kai idanoo nitaufaka saaeemminoo maridanoo.

Miqimasee Dafidifa misara akararinau.

¹¹ Qinee Pauroosa Isaraee maqannaara maaqi qimasee iraidaqa, Yuda maqannaasa Yisunasaa farindamaki saamuriqa kuridiranaki taikaranaki aqufiqee iqau. Sia uqanna miqiqau. Isaraee maqanna aaqoonara Anutuna asumu marirafa aanaamurusaa aqufinau, Yuda maqannaasa aanaamuruara rairaiqiaqera miqinau.

12 Yuda maqannaasa aaqaranara Anutuna firaa amiqi amiqirana aanaamuru aiqama maqa afaaqasasa mariasa niminau. Yuda maqannaasasaaqaraana aanaamuru amiqi amiqirana maraqau, kasooqaqee taikara aukwana Yuda maqannaasa Anutufa aiqama mareeqeenoo aanaamuru nimuna akiaqara firaa amiqi amiqiranaki uriqararanaki Yuda maqannaasa quqaannoo.

Anutufa Isaraee maqannaasa minniseenoo aanaamuru anireeqa Anutuna aqoondikiqau.

13 Qinee Pauroosa Yuda maqannaara inni qimannimiseeqa kafaa maqee inniara aanaamuru qimannimidaqa, Anutufa aanaamuru qimannimiranara diqiqoosa maridaqa inniki ainainimarunnaara asasidaqa.

14 Anaamuru qimannimi marunaqa Yuda maqannaara inniara Anutuna ufara iridammiafoo qimasee rairai qimasee misa faqa irisee irirana mi ufanasaa rusiaqeera asasidaqa.

15 Yuda maqannaasa Anutufa mininnisoofaqa aanaamuru aniree Anutuna aqoondikiqau. Kasooqaqee Anutufa quandaki Yuda maqannaara kafaa marainaqa kuqiranakiqari findifiara foora ifaranoo.

16 Maasa Yuda maqannaasa Anutuna amira ainainara maaqi qidaqa. Innee feemu adiana kai raqeeqee Anutuna amifanoo mi feemufa aiqama minaindikakaimminoo mariannoo, kafaa innee saqari oosana amifanoo mi saqarifa minaindikai mariannoo.

17-18 Doo qinee mi iriranamau fidaqa minara maaqi qidaqa. Oorifa saqari asumu

saunara foora maridanoo. Asumu saqari ammuqu akaqafa raqanoo marifanoo kaasau oorifa saqari asaana raqeeqee minakina mini ookaamandee ummaqusainanoo minakiqari kambiqaannoo. Innee aanaamuruara kaasau oorifara foora mariafanoo. Yuda maqannaasa oorifa saqari asumu oosana maridaqa. Anutufa inni aanaamuru mariasa kaasau oorifa asaanara foora asumu oorifa minaki ookaamasaifanoo kambiqaqifaqa innee maqee Yuda maqannaasa akaqausa faqa misaindi oosana amiqi amiqiranasaqaraana animaree mariafanoo. Innee aanaamuru mariasa asumu oorifa ammuqu raqaranaki innee ookaairausa mariafanoo, sia misara raqara asaanara fidiqaa iaqa. Innee naqimaseeqee noori uqeeraseeqa inneeqara amiqirausee qidee innee ammuqu mariafanoo, sia ammuqu fannoo saqari oosana pooduqaidanoo, oosana fannoo ammuqu poonduqaidanoo, minara sia innee oosana mariasara Yuda maqannaasara fidiqaa iaqa.

¹⁹ Innee minara irisee maaqi qifaranoo Anutufa maasa aanaamuara iriseenoo asumu saqari ammuqu raqafufanoo maasara kai iridanoo fee qifaranoo.

²⁰ Qinee Pauroosa minara maaqi qidaqa Innee doo kuqaa qiafanoo, Anutufa Isaraee maqannaasa sia irirana mina ufasaa rusimarufanoo aadana asaanara foora raqanau, innee irirana mina ufasaa rusimarunara inni mareeqee minaki ooka inau. Innee minara irisee sia noori uqeeraaqa, rufiaaqa.

²¹ Anutufa mi saqarina naríndi Yuda maqan-

naasara sia amuqusinau sia Yisunara irisoonara kaqi atekaanau innee faqa rufiaaqa kaqinni faqa atekaannoo, kaasaummia.

²² Maanara amiqimasee iria sia aunuaqa Anutufa narí qaara oosana maaqimminoo maridanoo mina dinni kaaqa faiqí anaaseera amuqusirafa maridanoo kafaa mina dinni manda ainainara aanoo irafa maridanoo. Mifa mandainainaki saamurimariasara aanoo irafa kai maridanoo, innee kaqi mina afaariranaki maqee maqee fimarifanoo mifa inni nifauamaseenoo amiqi amiqianoo, minnisaifanoo inni faqa Yuda maqannaara foora aadana asaanara foora inni rauda aqusaannoo.

²³ Yuda maqannaasa nariqa dapi nirana minnisee quandaki kafaa aniraifanoo Anutufa misa qumaree nári nimaqaaki kafaa ookaa iannoo, Anutufa mina faqa amanaikamiannoo.

²⁴ Asumu saqari asaana atekasee narí amaaqakina ookaamandainanoo dauni ururaannoo, mi oosanafa sia kadaapirirafa maridanoo. Kaasau saqari asaana atekasee asumu maraqa nua oosanaki ookaa inanoo sia dauni dauni kambigaannoo kadaapiruannoo. Minara irisee Anutufa Yuda maqannaasa oorifa saqari asaanara foora raqaqa mariasa amana mareeqee narí amaaqakina kaifaa ookaa inoo sia kadaapiruannoo. Innee aanaamuru mariasa kaasau oorifa saqariara foora mariafanoo asumu saqarikina innee ookamaqaifaqa mariafanoo. Innee sia Anutufa kafaa Yuda maqanna ookaa ianinnanara sia amanee qiaqa, doo Anutufa amana sia kadaapi maridanoo, kaqimma ookaa

iannoo.

Anutufa aanaamuru naaree marasee miqoo Yuda maqannaa naundura quandaannoo.

²⁵ Oo qini qikaqaafasaa ufa moo kukeeqara ufa inniara iriaqeera qimannimianaura, innee maa ufana iriseeqa inneeqa noori uqeerarana mara maqaruseeqa miqooqari reendeenamandee marifaranoo. Mi anoona ufafa maaqimminoo maridanoo. Isarae maqannaasa naaqooki ooni ititarafa sia naaruara miqinoo mariannoo. Anutufa qinoo aanaamuru marinausakiqari qinee qeeqa qiafanausa misa kai Yisufinnai irirana ubeekaifaqa Yuda maqannaa naaqooki ooni ititarana tatusaanaqa misa faqa anifaranoo.

²⁶ Maaqimmasee aiqama Isarae maqannaasa Anutuna asumu marirana mareefaranoo. Tamummaqara fasiqauqa maa ufamau mareefaranoo.

Asumu maree marifa Sioona maqusai moo auqu Yeerusaree mi maqusanaindari aniree asumu marirana nimiannoo. Mifa Yakooboona aiku asauku mina atiuqa mariasa mandainaina aiqama rukannisaannoo.

²⁷ Mikari qinee Anutusa Yuda maqannaasa aaqarana akiaqara mara aqunniseeqa qinee Anutusa qeeqa moodaanakikirafa ufa Abarahaamana faqa Isakeena faqa Yakoboona faqa ufa qiafannana mikari mi ufana anoona doo anoonaikiannoo.

Tamummaqarausa ufa miqinoo marinara qinee Pauroosa maaqi qidaqa.

²⁸ Yuda maqannaasa Yisuna amiqira fasaasa ufa minnisoonara Anutuna ufaasu namuqaa kammiqa maridaqa. Sia fifau, inni aanaamuru mariasara iriseenoo Anutufa miqimma nimaqasoofaqa miqidaqa. Anutufa Abarahaamana Isakeena Yakooboonara iriseenoo, aiqama aanaamurukinaana rusandeesamumandee maroonara iriseenoo misasaa aruakinausa misa amiqi amiqimma nimaqoonara iriseenoo Isaraee maqannaasara qini qiqoondi fee qidanoo.

²⁹ Anutufa narí rusandeesamumasee maree mariasara faqa narí amiqi amiqimma nimaqee mariasara faqa sia qaara iriranaikidanoo andeeqaidanoo sia kaaqa Isaraee maqannaana muqaakinoo, ufaasu kai.

³⁰ Innee aanaamuru marusa ooqai ufa rukiee marusa mariafanoo doo maqee Yuda maqannaasa ufa rukioonara faqa innee mina ufa irunara Anutuna nifauarana maree mariasa mariafanoo.

³¹ Miqi kaimmasee innee aanaamuru Anutuna nifauarana maree mariafanoo Yuda maqannaasa faqa Anutuna nifauarana maraaqeera ufa rukiaranaki quqasoofaqa mariafanoo.

³² Anutufa aiqama maqannaasa narí nifauara oosana uqannifiqaanifeera aiqama maqannaasa ufa rukiarana ameemaanai mara quqasoofaqa Anutuna nifauarana oosana qafaaqeera.

Pauroofa Anutuna amooqu ufafa.

³³ Oo Anutuna irirafa ainaina faifa firaaqoo maridanoo. Mina irirafa faqa auqarafa faqa firaaqoo farummara foora meemai unaurinoo maridanoo. Mina naamuaqira ufa oosana yafee

mina iriannoo fee, sia amanaikidaqa. Mina nirana yafee iriannoo fee.

³⁴ Tamummaqara fasiqauqa minara maaqi qiqau.

Yafee karaambaiqa irirana faasai iriannoo fee yafee fuki faaki iannoo fee.

³⁵ Yafee moo ainainara qufiqeenoo qimianifee qimasee amiannoo fee. Sia moo fannoo amanaikiannoo.

Doo tamummaqara fasiqa ufa miqimminoo maridanoo qinee Pauroosa minara maaqi qidaqa.

³⁶ Naqimasee moo fannoo Anutuna moo ainaina amiannoo fee nari kai aiqama ainaina auqufa minaindi kai maridanoo. Aiqama ainaina minasaa qaraafa kai afeekaikinoo maridanoo. Aiqama areenarafa naaru naaru Anutunaindi kai mariannoo. Kuqaa.

12

Pauroofa andeeqasee nirana mariranara naa-muaqinau.

¹ Oo qini qikaqaafasaaauqa, Anutufa inniara amuqusirana faqa amiqi amiqirana faqa firaaqoo marinara afeekaikamandee qeeqa qimuqusa ookiqari inni qimannimidaga innee inneeqa marirana nipata aandau tatufiranara foora Anutuna amiaqa, Anutuna ufamau fidaqa mina aidira ainaina andeeqasee marirana mina mina amiaqa. Miqiga inniga Anutunara innaaru qirafa amooqirafa anoonakiannoo.

² Minara irisee maaqimmiaga sia maa maqa maaqanasaa mariasa naanna raaqa. Innee eedoo qifanoo Anutufa inni nitikura amiqimmasee firaaqoo quandanniseenoo naunduraki nirana faqa quandannisaannoo. Innee miqimmaseeqa Anutuna irirana faqa Anutuna aidirana faqa amiqiranee qimariana faqa idaaqiranee qimariana faqa amiqimandee irifaranoo.

³ Qinee Pauroosa Anutufa afaarida nimimari ainainara irisee maaqi qidaqa. Innee sia inneeqara amiqirausee qimasee firaaqoo inneeqa nimooqiaqa innee andeeqasee reendeenamaseeqa inneeqa nimana kai irirana iriaqa. Aiqamausa náriara qidaqa Anutufa faiqí anaasee dadaaqira nimirana irisee mina amana kai nariqa kai iriaqa, sia noori uqeerasee inneeqara firaaqoo irirana faqaasee qiaqa.

⁴ Maasa qipata moomoo ati ootupanoo maridanoo. Mi ootupara atisa naadu naadu ainaina quqee mariasa maridaqa.

⁵ Maasa miqirausa maridaqa asauku mundiranasaa ootupaqa marunausa moomoosa naadu naadu nipata atiara foora mariasa moodaa qipatara foora mafiqa Yisunaindi maridaqa narisaa narisaa atooqa maridaqa narisaa narisaa mundiqa mariaqeera.

⁶ Minara maasa aiqamausa irisee nariara nariara aadu aadu akoofasaiki marinna ainaina marasee minannai Anutufa nimuna akoofasaikirana amana kai minannai kai aiqamausa narí dadaaqi narí dadaaqiaqa. Anee Anutunaindaraa ufa irisee faiqí anaasee ufa qimannimi marianafa

maridana, Anutufa narí saqarikirana amuna mina amana kai qimannimia.

⁷ Anee dadaaqimarianafa akoofasa maridana doo misa dadaaqa. Anee ufa akoofasa maridana doo mina ati qimannimia.

⁸ Anee reendeenamandee fuki faaki qirana akoofasa maridana doo miqimmia. Faiqí anaasee moo fannoo narí akaqa nimira ainaina akaqausa raina nimidanoo sia akoo akaa ida nimia, oori inaa inaa ida nimia. Anee faiqí anaasee rakisi marinafa maridana anee faqa eeraaramasee ainainia. Faiqí aanaaseera qimudao qimasee dadaaqa mariasa sia nikoo nikaa mandeeqa miqia, اساسmandee oori inaa inaa idana dadaaqaqa.

⁹ Inniki nariara nariara nimuqusirafa inniqa nimuqusannai kai nariara nariara nimuqusiaqa. Innee aiqama manda mariranara fidaqaamasee amiqira marirana kai rakisissimma qumaraaqa.

¹⁰ Innee aiqama asauku mundirana mandaaqaqa mariasa minara irisee nariara nariara qikaqaafasaa fee qimasee nariara nariara nifaaqasaa aqoondiarara foora nariara nariara andeeqasee ridaqa asasiaqa. Inneeqa niqoonnana maasa uriqararane qimasee maqee maqee mina auqu kooroo qia.

¹¹ Innee inneeqa oosana oosana ainainiranaki maridaqa nimudaana qimaseeqa kadaapiruaqa sia kudoosaapaaqa. Inniqa nimuqusaki karaambaiqara nidirafa qumbiqanoo marinaqa mina ainainammidee qidaqa اساسmandee mi kadaapina riqa fuaqa.

12 Innee Yisufa qumuaninnanara afeesidaqa asasidaqa kai mariaqa, maqee maria kadaapirira ummaarafa rafaqaqafinaqa naundura asoamasee kasooqaaqee ubiqafiqqa reendeenamasee kaqi kai minaki fuaqa, maqee maqee innee aiqamausara faqa aiqama ainainara faqa innaaru qimannisaaqa.

13 Innee niqoonausa Yisuna ufa irimariasa nana ainainaree sarau imariasa inneeqaindi misa faqa rainasee naida nimiaqa. Sia qafee marinna aanaamurufa faqa anirainana amiqi amiqimandee maaqa aminanoo tootooqiranaki fuani.

14 Faiqi anaasee akaqausa Yisuna ufasaara nari niqifaqa innee quandakinaqa sia minara iriaqa amiqi amiqira afaaqooqa kai qimannisaaqa, sia niquraraaqa amiqi amiqima nisaaqa.

15 Faiqi anaasee akaqausa asasifaqa innee faqa dadaaqiqa asasiaqa. Faiqi anaasee akaqausa ummaara narinaqa ikiraqaifaqa innee faqa dadaaqiqa ikiraqaaqa.

16 Aiqama narinni narinni maridaqa moodaanaki kiqa maridaqa aqoondikidaqa mariaqa. Sia innee inneeqara uriqararausee amiqirausee qimasee noori uqeeraaqa. Kaqiqaesa ooreeqararausa faqa aqoondi kiaqa. Sia misa ooreeqararausara noori runusee noori uqeeraaqa.

17 Moo fasiqa anaasee fannoo ani mandaikammamaqainana sia anee mina akiaqara mina mandaikammamaqa, aiqama fasiqanaasee amiqira oosanee qimariana, mi oosanna amanamasee mi oosanamau kai fuaqa.

18 Anee aiqama fasiqa anaasee faqa asoaranaki kai mariaqa, misa sia amanaikifana aneennakai kafaa kafaa amanida qafaa.

19 Moo fannoo ani arinoo mandaikamma-maqainana sia anee mina akiqara arua, Taikara aukwana Anutuna aanoo irafa minasaa mari-annoo fee qimasee miqoo minnisaa. Tamummaqara fasiqa akara minara maaqi qinoo maridanoo.

Karaambaiqa maaqi qinoo qinee mandainaina akiqara nimianaura, ani arifaqa qeeqa kai mina akiqara qianaura.

20 Kafaa moo fannoo maaqi qinoo.

Ani namuqaa fannoo aararee marinana narana kaqi amia.

Nammariara mifa aidinana kaqi amia. Anee miqinana aneenna amiqira iriranannai asaurirana mina aminnaranoo.

Qinee Pauroosa minara mi tamummaqara fasiqana ufamau fuaqera qimannimidaqa.

21 Faiqi anaasee mandainaina fannoo sia inni rafaqa fuani, inneeqa amiqira oosanannai misa mandoosana rafaqafuaqa.

13

Aiqama uriqararausa Anutufa kai quqaqoosa maridaqa.

¹ Aiqama kaamanauqa faqa uriqararausa faqa Anutufa kai quqaidanoo. Sia moo fannoo nari kambiqaidanoo, Anutufa eedoo qinara kai kambiqafi maridaqa. Minara irisee innee aiqamausa misa ufamau kai fuaqa.

2 Faiqí anaasee moo fannoo kaamanauqa ufa rukiee marinafa Anutufa quqaqai fasiqausa ufa rukiee mariafa marinnarannoo. Anutufa quqaqoo fasiqausa ufa rukiainafa mi fasiqausa saaqaraa aanoo irana aneenna kai mareeqeena aneenna afaariki rusimariananoo.

3 Manda oosana maree mariasa kai kaamanna rakisirausara rufiaaqa, amiqira oosana mareemariasa sia misara rufiaaqa. Anee kaamanna fasiqa fee uriqarara fee misa nifusaa mana mana kai iraree fee qidanee doo amana andeeqara oosana marasee miqia. Miqinanoo mifa amooqira ufa kai ani amiannoo.

4 Kaamanna uriqararafa Anutuna saikira fasiqa maridanoo ani amiqimmasee marianneera ainainidanoo, anee manda oosana mareenana minara rufiaa mina akiaqara ani arirasamu doo asaukuki uaqeedanoo. Mifa mandoosana maree mariasasaa Anutuna aanoo irana mareeqeenoo misasaa quqemarifa maridanoo.

5 Innee minara irisee uriqararausa ufara aiqama eedoo eedoo kai qiaqa, sia Anutuna aanoo iranara kai iriseeqa eedoo qiaqa, aneenna aakiranara andeeqanoo marifaqee qimasee eedoo qiaqa.

6 Kaamanna fasiqauqee kansoorauqee uriqararausee, misa aiqama Anutuna ainainiranaki maridaqa faiqí anaasee andeeqannisaida maridaqa minara inneeqa takisa munnimma nimirana eedoo qimasee nimiaqa, minannoo ainainidammia.

⁷ Inneeqa takisa munnimma aiqama aquaqa, kaqikaa takisa kansoora takisa faqa kaamanna firaa takisa faqa aquaqa, aiqama uriqararausara amiqira fasiqee qimasee misa noorinni rufiaqa rufiaqa idaqa fuaqa.

Nariara nariara amiqira oosana kai maraaqee qirufa.

⁸ Sia moona ummaara ameemaanai keeqana maria aufadaranaki kai maria. Moodaa ummaara ameemaanaki kai keeqaqa mariaqa. Nariara nariara nidimarinaga mi moodaa ummaaranaki kai keeqaqa mariaqa. Faiqí anaasee moo fannoo narí aqoonna fasiqanaaseera amuqusinanoo Mooseena sandufa doo qumareenoo mi sandufana anoona paqurinoo kooroo idanoo.

⁹ Mooseena sandufakinaafa akaqafa maaqimminoo maridanoo.

Sia faiqí anaasee narí ummuari narí ummuariaqa.

Faiqí faqa anaasee faqa faiqi faqa sia kuqanaruqa misa fidika sia ruqiaaqa.

Sia narí ainaina narí ainaina ummuariaqa.

Sia moona ainainara amuqusinana marara aaqoo iria. Mi sandufausa faqa akaqa sandufauqa faqa moodaa ufa fannoo mi sandufausa aiqama rafaafafinoo maridanoo mi moodaa ufafa maaqimminoo maridanoo.

Anee aneennara amuqusi marianandee maseenana mi amuqusirafa kai aqoonnanara amuqusiani. Mi ufafa aiqama sandufa aruseenoo mifa anoonaikidanoo.

10 Faiqí anaasee moo fannoo aqoonna fasiqa anaaseera amuqusi marinafa naqimaseenoo moona mandaikammamaqaannoo fee, sia miqiannoo. Minara qinee qiqa, aqoonnana amuqusi marifa aiqama Mooseena sandufamau fimarifa maridanoo.

11 Innee mi fasiqana aanna raaga. Doo maa aukuana iqaqara aukuana maridanoo faiqaranakiqari findifira aukuana doo ani maridanoo. Ooqai innee inneeqa irirana Yisuna ufasaa rusisoofoa doo ani aniifanoo doo inneeqa asumu marira aukuana doo adeedi ramasee ani maridanoo. Minara faiqaranakiqari findi fira aukuanee qidaqa.

12 Doo asukuna taikararidanoo, iqaqarafa qusasaa aniannoo, maasa asukunaki nimariafanna manda oosanna oosanna mafi taikaseeqa faasaana amiqira oosana amiqira marirana duru feefara foora indamma qumaraaqa.

13 Maasa faasaanasaa nidara foora aiqamausa nifusaa andeeqarusaikakai mambi mariaqa. Sia mandainaina maraani qimasee moodaanaki suqaqa. Sia nammari namasee furufariaqa, sia faiqí faqa anaasee faqa narinni narinni ummuariaqa. Faiqí faqa anaasee faqa sia narí afaaqa narí afaaqa kooroo iaqa. Sia rakuqa, sia nariara nariara rairai qiqa.

14 Innee inneeqa faiqí faiqi manda iriranamau fidaqa fanandimariana minniseeqa mi aanausa oonu ititee ani ititemma atukaraseeqa quandaki Anutuna asaku mundirafa Yisufa maasa karaambaiqa mina andeeqaranaki fimariana

mina qumareeqa mi duru saamunannai maasa
faiqí faiqí manda marirana manda nirana faqa
rakuqa.

14

*Unna Anutunara dufi dufi qimaria narana
ufafa.*

¹ Qinee Pauroosa Roomma maqusanaasa
Yisuna ufa irimariasa qimannimidaqa. Innikina
oosana oosana fasiqa anaasee mariafanoo.
Akaqausa afeekaikamasee Yisuna mandaaqaga
maridaqa irirana minasaa kai mundusee
fimariasa maridaqa, akaqausa irirafa sia
Yisunasaa mapukimariasa mi fasiqausa irirafa
oorudupiraua maridaqa. Innee sia amiqira
irirana faqaasa kai mara maree inni suqiranaki
quqaaqa irirana oorudupiraua faqa mareeqee
kaqi moodaanaki quqaaqa. Sia misa moo
iriranara rairaiqiaqeera mareeqee quqaaqa.
Misa faqa Yisuna ufa irimariasa mariafaqa kaqi
quqannisaaqa.

(Ooqai Pauroofa maru aukuanna aandau
aruseeqa unna Anutunara tumunnai auqira
afaannara dufi dufi qimaseeqa makeetimarigau.
Yisuna ufa irimarusa namasaifanoo unna
Anutuna maraquna kafaa daakuandoo qimasee
rufieemariqau.)

² Faiqí moo fannoo narí iriranannai sia minara
iridanoo kai aiqama narana aandau naidanoo,
sia Anutuna ufa rukiaida miqidanoo. Faiqí moo
fannoo irirana oorudupirafa aandau namasee

qeeqa irirana kuridianoo qimasee narana kai naidanoo.

³ Innikina aiqama aandau narana neemarifa sia quandaki aandau sia nainnanara fidiqaamasee qinee qeeqaraa ani uriqararausee sia qia, Kafaa aandau sia nainnafa sia quandaki kaqi neemarinara qaoo qimannisaqa.

⁴ Innee aiqamausa Yisuna ainainimariasaa mariafanoo. Innee naqi fee mandee moo fasiqa ainainirana aqifaree. Mi fasiqafa moo fasiqa Yisuna ainainirafa maridanoo, mina uriqararafa kai mina oosana irisee mara uqeereeqee nari andeeqarana amanakai kikiqammaisaannoo karaambaiqa fannoo amana mina dadaaqinoo anoonaikiannoo.

⁵ Faiqi moo fannoo moo faasaanara uriqarara faasaanee qidanoo. Faiqi moo fannoo aiqama faasaanara amanamana kai fee qidanoo. Aiqa-mausa naadu naadu nari irirana mapukusee irisee doo mi mau fuaqa.

⁶ Moo fannoo moo faasaanara uriqarara faasaanee qimarifa karaambaiqa auqu uqeeraidanoo miqi qidanoo. Moo fannoo aiqama aandau narana neemarifa karaambaiqa auqu uqeeraidee qidanoo miqidanoo, Anutunara dufi dufi qidee qida neemarifa miqidanoo. Akaqa ainaina sia neemari fasiqafa mifa faqa minannai Anutuna auqu uqeeraidee qidanoo miqidanoo, Anutunara dufi dufi qida sia neemarifa miqidanoo.

⁷⁻⁸ Maasa qeeqa mariranaki maridaqa sia qeeqa qeeqa rakisida maridaqa, maasa kuqirana faqa sia qeeqa rakisidaqa karaambaiqa fannoo

kai rakisidanoo, maasa kaqi maridaqa karaambaiqa ainainiranaki maridaqa maasa kuqiqa karaambaiqaindi maridaqa mifinnai fidaqa. Doo qinee minara kooroo idaqa maasa kaqi maridee kuqidee karaambaiqaindi maridaqa.

⁹ Asaku mundirafa kuqiraua faqa kaqi mariasa faqa karaambaiqa marianifeera auniriranasaa kuqinoo minakiqari findifinai.

¹⁰ Qinee Pauroosa minara irisee iridaqa. Anee yafee maridanee aqoonnana oosana qafamaseenee aqinane. Anee yafee maridanee aqoonnana akooqaidanoo fee. Maasa aiqamausa Anutuna afusaa kikiqammafuananoo mifa maasa oosana qafammaseenoo raina qimaqaannoo, minara sia aqoonnana aqisee akooqaani, anee ureqarafa mariananoo.

¹¹ Ooqeenaa tamummaqara fasiqausa minara maaqi qidaqa.

Anutufa qinai. Qinee kaqi marira Anutusa uriqarararasa marunnanara qini ufa amiqimasee iriaqa. Aiqamausa qini doorisaa noorindari aqufiqa qimooqifaranoo. Aiqamausa qiniara Anutu fee qifaranoo.

¹² Doo qinee Pauroosa minara maaqi qidaqa. Maasa aiqamausa qeeqa nirana, marirana, qirana Anutuna afusaa kooroo ianaura. Minara iridaqa aqoonnana ireeda kai qiaqa.

Ani akaqaafasaa fannoo anee imarianna ainainasaa farindamaki saamuruandoo qia.

13 Nariara nariara ireeda kai marida sia munuqi miniqi qidaqa sia aaqara ufa nariara nariara qiaqa, sia maasa miqiaqa, maaqi-aqa, maasa Yisuna ufa irimarunausakina maridaqa moo ainaina maraananoo qini qiqoon-afa qiqafamaseenoo doo narí faqa mareenoo aaqaranaki aqufinaqa doo qinee mi ainainnara sia maraanaura rufiaanaura.

14 Qinee Pauroosa Karaambaiqa Yisunasaa atooaqa marunнанannai aiqama naranara anukara fee kai qimasee naidaqa. Faiqí anaasee moo fannoo moo ainainnara sia anukara fee qinafa mina amuqusakinaafa mi ainainnara rufiaannoo.

15-16 Anee moo narana amiqira naranee qimasee namasainanoo ani akaqaafasaa ani qafamaseenoo mifa faqa neenoo minasaa farindamakinoo moo mandainainaki aqufinana anee mina afaasuaa qiananoo mifa mandainaina numooki aqufinoo. Anee miqinana sia aneenna akaqaafasaara amuqusinana dadaaqiananoo. Asauku mundirafa akaqaafasaara minara faqa kuqinau anee nanaree fifau amiqira naranara neemarianannoo mandoosanaki quqeenanee. Anee miqinaqa faiqí anaasee ani oosana oosana naranara kaqi nifaaqa quqasee neefandinanara mandoosanee qifaranoo.

17-18 Anutuna ququsaki mariasa maasa nirana marirana sia narana nammarisaafau mundinoo maridanoofau. Anutuna naaquqara maraquna nimimari ainainausa andeeqarana faqa asooarana faqa asasirana faqa minamusasaa maasa marirana nirana mundinoo

maridanoo. Faiqí anaasee moo fannoo asauku mundirana ainainidanoo narí akaqaafasaa uqara amuqusimarifanoo dadaaqinoo rakisinanoo Anutuna amooqirafa faqa faiqí faiqi eedoo qirana faqa maraannoo.

¹⁹ Maasa minara irisee Yisuna aiku asaukuki nidaqa maasaki asooarana faqa narí afeekaiki narí afeekaikiqa Anutuna ufamau fuaqee qimasee mi mau fuaqa.

²⁰ Anutufa maasa moomoosa Yisuna moodaanaki quqaqoofaqa maasa sia mina kuridiqa furufariaqa. Aiqama narana amana nee mariafa maridanoo maasa moo amiqira narana namasaanoo maasa qikaqaafasaa moo fannoo qiqafamasee quandaki aqaranaki aqufinanoo maasa mi naranna naunannara aqarafa maridanoo fee qianaaura.

²¹ Andeeqasee nimariaanafa maaqimminoo maridanoo akaqa narana nammari fee namasaanoo qini qikaqaafasaa moo fannoo fee qini qiqafamaseenoo minasaa aiku amakinanoo kuridiranaki aqufuandoora mi narana nammari narara rufiaanaura. Nana ainainasaa fee qini qikaqaafasaa aiku amaki kuridiranaki aqufuannoo fee qimasee mi ainainara rufiaanaura.

²² Aninna irirafa narana nammariara sia faiqí aanaaseeki kooroomandee minasaa aanoo irafa raiqarafa kambiqaani Anutusandiri kai kukeeqasee iriaqa. Faiqí moo fannoo narana nammari nainara mina aakirafa sia qaoo qinafa mifa amiqira fasiqa اساسiranaki mariannoo.

²³ Kafaa mi fasiqafa moo ainaina namaseenoo oonumafi iridanoo Anutufa minara andeeqeefoo

qiannoo fee sia andeeqeefoo qiannoo fee qimasee qaara aundura irirafa mi fasiqafa mi narana nammarina namasainnanara Anutufa aaqee maqi qiannoo, sia Yisuna saqarikiranara irisee neenoo irirana furufaramandee neenoo, miqinnanara Anutufa aaqeenoo fee qiannoo. Maasa moo ainainana andeeqara fee mariannoo fee aaqara fee mariannoo qimasee qaara daundura irisee kaqi oonu qumarainafa aaqarafa maridanoo.

15

Sia aneenna aidiramau fua.

¹ Maasa Yisuna saqarikiranaki afeekaiki mariasa quandaki ureeqarausa qumaara dinni ati dadaaqa akumaraa, sia maasa qeeqa didirana-mau kai fua.

² Maasa naadu naadu qeeqa qikaqaafasaa nari Yisuna saqarikirana dadaaqiananoo afeekaikiani. Sia aneennara iria, aneenna akaqaafasaa amiqa amiqianifeera minara irisee dadaaqa.

³ Asauku mundirafa ririmma, sia nari aidiramau finoo, nari akoona Anutuna aidiramau finoo tamummaqara fasiqa minara maaqi qimasee akara rinau.

Faiqi anaasee Anutuna aqira ufa mandufa qimarifa qinisaa aqufinoo.

Tamummaqara fasiqa mi ufana qimasee akara rinau.

⁴ Aiqaama tamummaqara fasiqauqa akarakinaa ufa sia fifau akara riqau maasa naamuaqidee

qimasee akara riqau, maasa mi akaranakinaa ufa dadaaqidaqa fuki faaki qirana faqa ubiqafi marirana faqa marasee miqandannai Yisunara اساسمasee afeesirana maraaqeera akara riqau.

⁵⁻⁶ Anutufa ubiqafi marirana akoofa faqa dadaaqira fuki faaki qirana akoofa faqa maridanoo. Miqi mari Anutufa inni dadaaqinaqa innee asauku mundirana Yisuna aanna ramaseeqa innikina sia aanoo irafa mariannoo moodaa irirafa mariannoo. Moodaa irirafa innikina mari-naqa aiqamausa moodaa ufa kai qimasee asauku mundirana maasa karaambaiqa Yisuna akoona Anutuna amooqiaqa.

Anaamuru misa Isaraee maqannaa faqa Anutunara dufi dufi qifaranoo.

⁷⁻⁹ Asauku mundirafa inni qumaronara irisee innee nariara nariara aqoondikifaqa faiqi anaasee inni nindafamasee amiqira oosana maraidammiafoo qimaseeqa inni Anutuna amooqiaqeera. Anutufa nari qimaqoo ufamau fuanifee qimasee asauku mundirafa Yuda maqannaa mara firira faiqira foora ainainammannimaqara faiqi kamambinoo marinau. Anutufa Abarahaamana aiku asauku faqa qima afeekaikammasoonara kambiqaanifeera qimasoofanoo asauku mundirafa Yuda maqannaasa ainainammannimaqara faiqi kamambinau. Anaamuru mariasa anireeqa Anutufa misara amuqusufanoo nifauaranara faqa Anutuna auqu uqeerasee amooqiaqeera asauku mundirafa minara faqa

Yuda maqannaasa ainainammannimaqara faiqi kinau. Tamummaqarausa akarakinaana minara maaqi qinau.

Qinee aanaamuru namufaqa maridaqa misa saimbaqa aniara dufi dufi qianauro.

Miqooqari anauqu uqeeraseeqa idi raida ani amooqianauro.

¹⁰ Tamummaqarausa akarakinaafa moo maaqi qidanoo.

Innee aanaamuru mariasa Anutufa utaaqama nimaqee marisa Yuda maqannaasa saimbaqa dufi dufi qimasee asasiaqa.

¹¹ Moo tamummaqarafa maaqi qinau.

Aiqama aanaamuru mariasa karaambaqa amooqiaqa.

Aiqama maqannaasa firaaqoo mina amooqiaqa.

¹² Kafaa moo tamummaqarafa maaqi qinau.

Yeeseena atiki moo kambiiqaannoo, mifa findifinoo aanaamuru rakisiannoo, misa quandaki nári irirana minaki rusifaranoo.

Tamummaqarausa ufa Yisunara miqimmigau.

¹³ Anutufa maasa innaarunaira afeesirana oosanafaqaafa maridanoo, mifa kai innee mina saqarikiranannai aiqama asasirana faqa asooarana faqa innikina qumbiiqanni-maqaannoo, Anutuna naaquqara andeeqara maraquna afeeka fannoo inni dadaaqinanoo innaarunaira asasammasee afeesirafa mi asasirafa qumbiiqeenoo teeqiannoo.

Pauroofa afeeka ufa Roomma maqannaasa akara rumannimaqoonara qinau.

¹⁴ Oo qini qikaqaafasaaquqa qinee Pauroosa inni Roomma maqusai mariasara qidaqa. Qinee

inniara amiqirafa faqa irirana faqa qumbiqarausee qidaqa innee Roomma maqusanaasa amiqira irirana narí uqafiqee narí uqafiqee qimariasa amana mariafanoo.

¹⁵ Innee miqi marifaqa qinee maa pasanakina sia reendeenamandee inni naaqoo auqeeqa oosana oosana ainainara inni naaqoo firaqoo auqeeqa.

¹⁶ Anutufa amiqira ainainirana qini qiminau. Qinee asauku mundirana Yisuna saikaki quqaqisaifaqa maridaqa aanaamuru qimannimiranaki maridaqa.

(Mooseena uqiqaana maaqakina Anutuna aanaiqikira fasiqauqa sipsipa aanaaqi amiqirana kai faiqi aanaaseendi mara maree mini ooninnai auqira qaindasaa quqasee arusee aandau tatufirana Anutuna suqa amimariqau.)

Qinee aanaamuru faqa Anutuna faqa aanaiqikirausara foora marunnanara maa akaranaki afeeka ufa inni nimiqa, kaqiqeesa marifaqau sia afeeka ufa qimannimini ireeda kai qimannimini inni aanaiqikirausa maridaqara afeeka ufa qimannimidaqa. Anutuna naaquqara andeeqara maraquna fannoo aanaamuru mariasara Anutunaindi fee qimasee misauqa marirana nirana Anutuna aidirana amana kai mariaqeera minara kai Anutunai aanaiqi kirausaikidaqa maridaqa.

¹⁷ Qinee asauku mundirana Yisunasaa moodaanaki kamambi maridaqa maqasaa mi saikanaki marunanoo didimarifaqa asasidaqa.

¹⁸⁻¹⁹ Asauku mundirafa naaquqara maraquna qimifanoo dadaaqifaqa qeeqa

ufannai faqa qeeqa kadaapiriranannai faqa sia faiqí maraaqaa ira ainainannai faqa minauqannai qinee aanaamuru Anutuna ufa qimannimariafanaqa iriqa mi mau fidaqa, asauku mundirafa dadaaqinara firaaqoo qifaqa quqasee afeekaikamandee qimannimianaura. Qinee miqidaqa amiqira fasaasa ufa asauku mundiranara aiqama ufatia qimannimiqa Yeerusaree maqusa dinni Iririkumma maqusa dinni mi qambaana saqanna mariasa aiqamausa qimannimimaree fifainidaqa.

²⁰ Asauku mundirana aufakiana sia irimariasa kai qimannimiqa, qeeqa ufa moona ufa amuaqa rusianoora saina sia irimariasa kai qimannimia, ooqai indaaru doo qinee mi iriramau fidaqa. Mi mau fidaqa tamummaqara fasiqa ufamau fidee qidaqa.

²¹ Ooqai mi tamummaqara fasiqana ufa minara maaqi qinoo maridanoo.

Sia minara qimannimusa mina qafeefaranoo.

Sia irusa minara naaqoo irifaranoo.

Pauroofa Roomma maqusai firaree qimasee qimaqoo ufafa.

²²⁻²⁴ Qinee Pauroosa moomoo kari inni Roomma maqusai fuaneerunanoo oosana oosana ainainirafa rafaqaqafufaqa doo maqee maa saqa saika taikasee moomoo aukwana innee iannai fuanee qimarunauusa doo maqee qusasaa firaridaqa. Qinee Sipeena maqusai fidaqa inni Roomma maqusanaasa faqa namummaqeeqa inni faqa asasammasee marikammasaanaqa

innee Sipeena maqusai fuannana qiku auqirana dadaaqiaqee qidaqa.

²⁵ Inni maqusai fuani qunausa doo maqee Yeerusaree maqusai fuanaura oonureeqa oonurandee aiqareeqa inni maqusai fuanauranoo. Yeerusaree maqusai ooru fidaqa miqoo Anutuna ufa irimariasa dadaaqianaura.

²⁶ Maseedoonia maqa maaqakinaasa faqa Kirisa maqa maaqakinaasa faqa Yisuna ufa irimariasa nariqa munnimma aiqamausa ruaummasaafaqa Yeerusareenni Anutuna ufa irimarusa ainaina naranara sarauirausa mi munnimmana nimiraree qimasee qinisaa saafaqa maree ooru firarammidaga.

²⁷ Maseedoonia maqa maaqaki mariasa faqa Kirisa maqa maaqaki mariasa faqa nariqa kai ruaummasee Yeerusaree maqusanaasa nimiraree qidaqa, sia qineefau qiqau. Indaaruu Yuda maqannaasa nari innaarunai fira amiqira ufa Yisuna ufara aanaamuru naida nimisoonara mi aikana narinoo marina mi aikana tatiqa maqasaa amiqi amiqira ainainara munnimma nimifaranoo. Anaamuru mariasa miqiaqaana andeeqara oosana maridanoo.

²⁸ Qinee maqooqaraasa suquseeqa nimira munnimma mareeqa Yeerusaree maqannaasa aiqama uqanna munnimma nimiseeqa oonurandeeqa inni Roomma maqanna faqa qumu maridaqa asasidaqa amiqidaqa marianaura, doo marikiqa Sipeena maqa maaqaki oonuree misa faqa Yisunara qimannimianauranoo.

²⁹ Qinee inni Roomma maqanna iannai oonuree maa ainainnara iridaqa. Qinee asauku

mundirana afaaqooqa qiranasa a fidaqa mina amiqi amiqirana inni nimianauro.

³⁰ Oo qini qikaqaafasaa qinee Pauroosa afeekaikamasee inni qimannimidaga. Innee qiniara Anutufinnai innaaru qiranannai qini dadaaqaqa, Inneeqa nimuqusa ookiqari afeekaikamandee qiniara innaaruqaqa. Innee faqa qinee faqa asauku mundirafa Yisufa maasa karaambaiqa minasaa atooqafi marunausa maridaqa minara irisee qiniara innaaru qiaqa. Anutuna naaquqara andeeqara maraquna fannoo nariara nariara nimuqusirana maasa firaaqoo qimuna innee minara faqa iriseeqa qiniara innaaru qiaqa.

³¹ Qinee maindari Yeerusareenni ooruree misa nimirree qia munnimmana nimianaqa Anutuna ufa irimariasa minara asasiaqeera innaaru qiaqa. Miqoo Yeerusareenni qinee marianaqa innee Anutunara innaaru qimaqimaqaqa Yeerusareenni mariasa Anutuna ufa sia irimariasa qini darirarammidammia. Innee misara innaaru qiaqa qini sia daruaqee innaaru qiaqa.

³² Qinee Yeerusaree maqusaindari amiqimandee oorurandee qumuraananoo Anutufa qinnanara inni Roomma maqannaasa faqa kaqikaqaqoo idooamaseeqa asasammaseeqa aiqaree fuanaura.

³³ Anutufa maasa asoara oosana fannoo inni aiqama Roomma maqannaasa faqa mariani. Kuqaa.

16

Pauroofa nari aqoondiuqa nimandaidanoo.

¹ Oo qini qiqoondiuqa Roomma maqusai mari-asa anaasee moo fannoo Keenakareea maqusai Yisuna ufa irimariasa dadaaqimari anaaseefa maasa nisookifa mina auqu Foeeebee nammarifa qusasaa innee iannai Roomma maqusai fuannoo.

² Mifa andeeqara anaasee marinoo oonurainaga innee Anutuna faiqi namu naanna ramasee karaambaiqa ufa irimari anaasee fee qimasee amiqimandee qumaree rakisidaqa mi anaaseefa moo ainaina ummaara moo bisinisa Roomma maqusai auqainaga innee kaqi dadaaqiaqa. Mi anaaseefa moomoo fasiqa anaasee dadaaqirafa qini faqa dadaaqira qiqoondi maridanoo.

³⁻⁴ Inni Roomma maqusai maria fasiqa anaaseeqanda, anaasee auqu Pirisikaa nammarifa maridanoo afaaqi auqu Akuiraa mi qafaqiqanda qini dadaaqirana nári kuqiranara paasoosamandee moomoo kari nimeekaranaki fidaqa qini dadaaqimariasa maridaqa, asauku mundirana Yisuna ainainirana dadaaqi mariaqanda maridaqa. Sia qini kai dadaaqimariaqanda aiqama aanaamuru Yisuna ufara suqufi qimariasa misa faqa dadaaqimariaqanda marianara misa faqa qinee faqa miqandara dufi dufi qidaqa. Qinee maa pasanaki mi qafaqisa nimandaيدا.

⁵ Mi qafaqisa maaqaki Yisuna ufara suqufi qimariasa amaana maqa sia marinara suqufida qimariasa misa faqa maa pasanaki nimandaيدا. Qini qifaaqasaa qiqoondi auqu Eepaeneetusafa aiqama Asia maqannaakina indaaruu asauku

mundirana aqoondikufa, qinee maa pasanaki mina faqa amandaidaqa.

6 Moo anaasee auqu Maria nammarifa (sia Yisuna anoofau mina amarafa) firaagoo inni Roomma maqusanaasara kadaapirufa maridanoo qinee mina faqa amandaidaqa.

7 Qini maqannaa Yuda maqannaa fasiqa anaasee qini faqa karabusaki maruqanda nuqu Andaroonikusafa faqa Iunia nammarifa faqa mi qafaqisa naaree Yisuna saqariki maruqanda maridaqa qinee innaaqianna. Yisufa niqiqoo fasiqausa amiqimandee miqandara iri mariqau. Qinee miqandara faqa maa pasanaki nimandaidaqa.

8 Qini qifaaqasaa qiqoondi moo auqu Ampariatusafa mifa faqa maasa faqa karaambaiqa ufaki maasa faqa moodaanaki mariufa inni faqa marifaqa mina faqa maa akaranakiqari amandaidaqa.

9 Asauku mundirana ainainiranakina maasa faqa moodaanaki mariufa. Urabanusana faqa inni faqa marina amandaidaqa, Qini qifaaqasaa qiqoondi moo auqu Sarakisafa inni faqa marina amandaidaqa.

10 Apeeresana faqa amandaidaqa, mifa aukwana aukwana asauku mundiranasaa atoogafinoo mina ainainirana faakanaikirafa marifa. Aristooburusana faqa mina aiku asauku faqa nimandaidaqa.

11 Qini qiqoonna Yuda maqannaa Eeroodioonana mina faqa amandaidaqa. Narakisusana nari aiku asaukukiqari Yisuna ufa iri mariasa nimandaidaqa.

12 Anaasee qaaraqanda asauku mundirana ainainiranaki maru aanaaseeqanda nuqu Tiri-fae nammarifa faqa Tirifoosa nammarifa faqa miqanda faqa nimandaidaqa. Anaasee moo qini qifaqasaa qiqoondi Karaambaifa saika firaqoo uqanna maree marifa mina auqu Peerasisa nam-marina faqa amandaidaqa.

13 Karaambaifa saikaki mariasakiqari amiqi-rafa mina auqu Rufusafa mina anoofa faqa qi-nee faqa mina amaakuara foora marunnaara miqanda qisanoosara nimandaidaqa.

14 Maa fasiqa namusa nuqu raanaura. Asinakaritusafa faqa Fareekoonafa faqa Qeerameesafa faqa Patarobasafa faqa Qeeramasafa faqa minamusa faqa aiqama Yisuna ufa irimariasa faqa misa nimandaidaqa.

15 Firoorookusafa faqa Iuriafa faqa Neereeusafa nari asookisandiri faqa Oorimpasafa faqa aiqama Anutuna ufa irimariasa faqa misa faqa mariasa faqa nimandaidaqa.

16 Innee suqidaqa nariara nariara nikaqafasaara foora nari sukukee nari sukukee iaqa. Aiqama maqusa maqusa asauku mundirana ufara suqufi qimariasa misa faqa inni Roomma maqanna nimandaidaqa.

Akaqausa rainee mariasa mi ufanara eerairi-aqa.

17 Oo qini qikaqaafasaa uqa qeeqa qimuqusa ookiqara afeekaikamandee inni qimannimidaqa. Akaqausa rainara ufa oosana areemarisara eerairiaqa. Misa Yisuna saqariki mariasa

akaqausa kuridi nimaqaidaqa innee maroo andeeqara ufana atekaidaqa, misara rufiasee nianai mariaqa.

¹⁸ Miqi mariasa sia maasa karaambaiqa asauku mundirana ainainau idau, misa nári nidimari mandainainara kai randaida iridaqa. Misa nári nimanira ufannai faqa nári nifaurunnai kai susumma nimaqaranannai faqa amiqira fasiqa anaasee iriranara uneemaana qidaqa.

¹⁹ Aiqama maqannaasa inni Roomma maqannaasara iridaqa innee Yisunasaa atooaqa marianara irimariafaqa qinee faqa iridaqa اساسidaqa. Qinee inniara oosana oosana amiqira oosanara akoofasauqa mariaqee qidaqa, oosana oosana mandoosanara aaminaikiaqee qidaqa.

²⁰ Anutufa maasa asooarana oosana faqaafa qusasaa Sadannana inni niku ameemaanaira foora mareeqeenoo quqasee radamusaannoo. Karaambaiqa Yisuna afaarirafa inni faqa mariannoo.

²¹ Maaqoo qini faqa mariasa nári niman-darana inni nimidaqa misa nuqu Timootifa qini moodaa ainainirana dadaaqi marifa inni nimandaiddanoo Rukiusafa faqa Iasoonafa faqa Soosipateerafa faqa misa aiqamausa qini maqanna Yuda maqanna mariaasa misa faqa inni nimandaidaqa.

²² Qinee Teeratusausa Pauroona ookinaana iridaqa maa pasana akara rimarunausa maridaqa, maqee qinee faqa Yisuna ufa irimarunausa maridaqa inni nimandaidaqa.

²³ Yisuna ufara suqufi qimariasa Kaiusana maaqaki maqee maqee suqidaqa, qinee

Pauroosa faqa mina maaqaki marunanoo mi fasiqafa Kaiusafa inni Roomma maqannaasa nimandaaidanoo. Qeeqa maqee marunna maqusanaasa munnimma kansoora munnimma rakisimarifa mina auqu Eerasatusafa faqa maasa qikaqaafasaa Kuaratusafa faqa inni nimandaidaqa.

²⁴ Maasa karaambaiqa asauku mundirafa Yisufa mina afaarinoo kaqi nimira oosana inni aiqamausa faqa mariani.

Ufati taikarufa.

²⁵ Doo maasa Anutuna areenarana amia, Ooqai oosana aroonakiqari kukeeqara anoona ufa Isaraee maqannaasa faqa aanaamuru maqannaasa faqa Anutufa asumu mariranaki quqaaninna ufana kukeeqanoo mariufa maqee Yisunaki koorooinoo maridanoo. Mi kooroo ira ufafa inni Yisuna saqariki mariana minaki inni amana mapuku nimaqaannoo. Amiqira fasaasa ufa asauku mundirana Yisunara qinee qimannimiqa nunnana, inni Yisuna saqarikirana mi ufanasaa mundinoo maridanoo. Amana Anutufa inni Yisunaki saqarikirana mapukusee quqannisaanoo.

²⁶ Ooqai mi kukeeqara anoona ufafa maqee naaru naaru marira Anutufa ufa qufanoo mi kukeeqara ufafa aiqamausakina akoosaqa kooroomafifanoo marifaqa qafaidaqa iridaqa. Anutufa ufa qufanoo Yisufa sia kambiqooqoo tamummara fasiqauqa Yisuna aufakiana kooroo iqau. Maqee faqa aiqama maqanna

qimannimiafaqa mi ufanasaa irirafa rusififaqa
iridaqa eedoo qimasee mi mau fuaqeera.

²⁷ Moodaa mari Anutufa nariara aiqama
ainainara irimarifa, mina asauku mundirana
Yisunannai naaru naaru areenarafa minaindi
mariani. Kuqaa.

**Fúka Moodaanaki Kira Ufa Afaqínaasa Ufa
Portions of the Holy Bible in the Binumarien
language of Papua New Guinea
Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

PDF generated using Haiola and XeLaTeX on 18 Apr 2025 from source files dated 31 Aug 2023

4a891130-f25d-5e30-a81c-882b2e037698